



□ 12
3005
2止

世紀

二
止



門 口 12
號 3005
樓 2



春秋王霸列國世紀編卷第

一列國同姓世紀 蔡

蔡周蔡叔子蔡仲之後也蔡仲克庸祗德周公以

叔既沒乃命諸王邦諸蔡仲越九世而宣公考父立宣公二

十八年為魯隱元年春秋終始蔡十二公訖於成公十年由

成公以降歷三世而楚惠王滅蔡

隱元 宣二十八年

四伐鄭 伐鄭

八考父卒

葬宣公

蔡桓侯元年以蔡季請謚獨書侯

十伐戴

桓二鄭會鄧

五從王伐鄭

六殺陳佗

十一柔宋陳盟折

十四宋以伐鄭

十六會伐鄭

十七封人卒

哀公元年

季自陳歸蔡

葬桓侯

春秋列國世紀卷三

通志堂

二百五
莊五會伐衛

八次郎以俟

十荆敗葦以獻舞歸

史記謂哀侯留於楚九年卒

十三會北杏

十四荆入

二十蔡穆公元年表載是年始立

僖四會八國侵潰

十四肝卒莊元

十九會盟齊

二十一會孟

三十七圍宋

二十六會盟踐土 會温

二十九盟翟泉

文十次厥貉

十五晉卻缺伐入

十六文公元

宣十七申卒

葬文公景公元

成八晉欒書侵

襄八鄭侵獲燮

二十殺燮 履出奔楚

二十四伐鄭

二十六伐鄭

二十七會宋

三十世子般弑君固

葬景公靈公元

昭元會虢

四會申伐吳

五伐吳

十一楚誘般殺于申

楚圍滅執世子有歸用

冬楚子城陳蔡不羹使公子弃疾為蔡公

十三平元廬歸

蔡靈公

十五朝吳出奔鄭

二十廬卒

二十一葬平公蔡侯朱立當國一年為國所逐故不改元不稱蓋

朱出奔楚

楚費元極求貨于東國使蔡人立朱而出東國是為悼公 昭公元 都公元

三十三東國卒于楚

吳敗師雞父

定四會召陵侵楚

公孫姓滅沈以嘉歸殺之

楚圍

以吳及楚戰柏舉楚敗績蔡欲報楚也不以晉而以吳晉事亦可知矣此所以卒有黃池之會

五歸粟

哀元楚陳隨許圍

三遷州來

殺大夫駟

仲恒

三放大夫獵于吳

四盜殺申

辰出奔吳

殺大夫姓霍

葬昭公

成公元

十四

終成公十年成公十九年卒齊公繼立

序蔡世紀曰蔡何以始乎同姓昔者蔡衛嘗爭長矣長弘曰蔡叔康叔之兄也先衛不亦可乎則蔡固宗盟之長也蔡以宗盟之長乃甚略之何哉蔡以十二公而卒書于冊者惟六君稽其行事闕而不備春秋之義同獎宗國豈固置厚薄於其間蓋蔡以神明之胄其汙於事楚而不能反者春秋用夏正夷不以夷變夏此其不足於蔡歟夫蔡事雖略而聖人備著其始末焉不獨係一蔡之盛衰而中國消長之形荆楚強弱之端皆可尋矣蔡之始事錄于經曰蔡侯鄭伯會于鄧始懼楚也蔡之終事錄于經曰蔡遷州來圖避楚也則蔡之始

終不靖者皆以楚故也楚之始事錄于經曰荆敗蔡師于訾楚之終事錄于經曰楚子陳侯隨侯許男圍蔡則楚之終始用事者又皆以蔡故也齊晉之伯其始事錄于經曰侵蔡遂伐楚盟于召陵治蔡之黨楚也其終事錄于經曰會于召陵侵楚以蔡之請伐楚也則中國之始終用師者皆以蔡故也原始占終則蔡固有關於夷夏之世變不可不察也大抵蔡邇於楚而親於楚事楚愈堅而蒙楚之害愈深蔡遠於中國而踈於中國其貳中國最甚而中國亦無力以及蔡凡中國之糾合夏盟諸侯狎至而蔡獨不附凡楚之撓敗王略諸侯莫從而蔡獨先與方蔡宣桓二公之初從王伐鄭則猶修勤王之職也會于鄧盟于折會于曹則猶交諸侯玉帛之好也伐鄭伐戴伐衛則猶同諸侯兵車之會也自敗莘以來五年兩被荆師哀侯蒙塵不返其臣不能告於同盟厲復讎之大

義乃甘為楚向釋戴天之至怨納肘腋之深交由是渙然與中國離矣齊桓稱伯蔡僅一從北杏之會穆莊以後行李不至贄幣不通雖召陵加師國潰而無從夏之志齊桓終不得致蔡於盟會齊桓既沒晉文未興楚成抗衡北方蔡是攝是贊十九年楚盟齊則蔡首偕至二十一年楚會孟則蔡復偕至二十七年楚圍宋則蔡又偕至何不移所以事楚者加於事齊而反忘其讎楚而服楚哉城濮之戰楚既大創蔡始改圖晉之三會甯勉周旋踐土載書曰晉重蔡午藏在周府列國皆能道之則蔡之子孫世踐舊盟可也奈何蔡莊身自背之晉文即世無復向晉至文十年厥貉之次遂執干戈挾楚穆為窺宋之謀十五年晉卻缺討其不與新城之會蔡雖甯勉從城下之盟貳晉如故也文公方謀事晉畏楚不得行而卒景靈不紹文志反堅於與楚成六年藥書之師方涉蔡鄙

而楚申息之救已至蔡自以附楚為良圖也晉悼之興列國使焉如陳如鄭相率事晉矣蔡且安於楚之宇下襄八年鄭以晉命侵蔡獲公子變而楚復興子囊之師為蔡仇鄭悼公得陳鄭而力已疲矣所以姑置蔡於不問晉平之出蔡之大臣病於楚令之無常將改事晉以利蔡可謂忠計矣當時反曰異謀誤國謹而殺之夫蔡之君臣陷溺於從楚去順效逆不知其非而反以即華為悖宜其錮於黨楚而不返也或謂蔡在春秋中世國勢單弱剪焉無以自通於夏盟然宋虢二會晉楚各以其從交相見蔡公孫歸生首以楚屬攘臂於列國大夫之上而陳鄭莫之敢抗則蔡非不能堅隨北方兄弟之國也靈公有篡弒之惡懼中夏之討奉楚最勤昭四年申之會書曰楚子蔡侯其伐吳滅賴又書曰楚子蔡侯五年伐吳復書曰楚子蔡侯蔡楚之相得未有若靈公之至也閱六

年而楚子誘蔡靈公于申矣以爲未快也又刑其士七十人矣復未足也而用隱太子崗山矣滅蔡以封弃疾矣蔡之蒙禍亦未有若靈公之極也方蔡人誅公子變之謀自以事楚爲百世之利豈知君戮國夷豕嗣俱屠從楚之報乃至如是哉晉昭公大合八國于厥憇將以救蔡不能振旅反使卑辭請蔡于楚楚虔方張晉旣不能弭蔡之難楚虔旣殞晉又不能復蔡之祀終焉蔡廬以弃疾之命復國則蔡之存亡廢興皆宅命於楚而中國安得有之乎蔡廬以隱世子之適嗣岡山之痛獨忘之邪流涕而枕戈猶未晚也掩恥事讎則天理絕而人道不能立矣蔡朱東國之廢置專於楚費無極之言夫廢君立君國之大事而楚之小臣得以制之是楚之鄙邑也蔡何國之爲蔡昭抱累世之憾復以一裘一佩之微遭二年拘郢之辱沈玉璧以絕楚質愛子以請晉氣憤而情激使

中國有伯雖加惠於蔡伸義於楚則蠻荆無奸夏之患宗國無從夷之變矣召陵之役晉人求貨而辭蔡諸侯侵楚之師不出楚人圍蔡之師反至柏舉之戰入郢之師遂使蔡人假手於吳以釋楚憾楚禍旣深蔡憂未已是以哀元年楚復圍蔡使蔡人男女以辨疆於江汝之間蔡之傾覆是懼謀徙州來突墓而遷君臣相戕以及公孫翩之禍迄春秋以後蔡終爲楚所并蓋蔡之依楚如鹿豕逃於餒虎之側將以求安其不噬嚙不止也夫以中國諸侯雖有即楚者犧牲待於二竟未有如蔡之附楚而不變者也然蔡之五禍皆楚實爲之楚文之執獻舞蔡國十五年無君則蔡之禍一也楚靈之殺蔡般蔡祀嘗絕則蔡之禍二也楚假無極逐蔡侯朱則蔡之禍三也楚子常執蔡昭于郢則蔡之禍四也楚昭遷蔡于江汝則蔡之禍五也故曰蔡事楚愈堅而蒙楚之害愈深也蔡之

自絕於中國謂楚之險可恃而齊晉之不能朝夕勤我也然
觀蔡文公欲事晉曰先君與於踐土之盟晉不可弃且兄弟
也蔡昭公歸郢質子之際可謂決於奉晉矣譬諸草木吾吳
味也夫豈不欲從諸夏之列而晉之力亦未能有蔡是以晉
之失蔡者三厥慙之會晉中行吾曰不能救蔡物以無親已
為盟主而不恤亡國將焉用之子皮之行子產已知其不能
救蔡此晉之失蔡一也平丘之會蔡廬失國晉無繼絕之義
中行穆子曰楚滅陳蔡晉不能救此晉之失蔡二也召陵之
會晉荀吳曰弃盟取怨無損於楚不如辭蔡侯反以伐沈遺
蔡之患此晉之失蔡三也故曰蔡貳中國最甚而中國亦無
力以及蔡也昔周公弔蔡叔之不咸其封蔡仲之冊命曰睦
乃四鄰以蕃王室以和兄弟使蔡人無荒弃周公之訓捨閔
牆之爭思外禦之謀思兄弟和而四鄰睦王室尊而夷狄懼

則楚雖強大又何畏乎

二列國同姓世紀 曹

曹周曹叔振鐸之後也振鐸文王之昭武王之介弟也武王
克商封振鐸于曹凡歷十四世而桓公終生立桓三十五年
為魯隱公元年春秋終始曹十五公訖于曹伯陽十五年實
魯哀公八年而宋景公滅曹

隱元 桓公三十五

桓五 曹始見經 州公如曹

九曹世子射姑朝

十終生卒 葬桓公 莊公元

十四會曹

十六會曹

莊十四伐宋

二十三射姑卒

二十四葬莊公

戎侵

羈出奔陳

赤歸 僖公元

杜預謂羈蓋曹世子也赤曹僖公也為戎所納按世紀曹世家與二十國表僖公名夷則赤非僖公也公羊謂曹羈為曹大夫公毅二傳皆謂赤為

二十六殺大夫

閔元 昭公元

僖元次聶北救邢 城邢

會榿

四會侵蔡伐楚

會侵陳

五會首止盟首止

六會伐鄭圍新城 救許

七班卒 葬昭公 共公元

八會盟洮

九會葵丘盟葵丘

十三會鹹

十四城緣陵

十五會盟牡丘 次匡

救徐 伐厲 宋伐

十六會淮

十八伐齊

十九盟曹南 宋圍

二十一會孟

二十八晉侵入執伯冝宋

襄復歸曹遂會圍許

文元襄卒 葬共公 文公元

十四會同盟新城

十一來朝

宣元會棗林伐鄭

十五來朝 齊伐入郟

七會黑壤

三宋圍

十伐鄭

九會扈

十四壽卒 葬文公 宣公元

十二同盟清丘

成二會戰鞏

十七會同盟斷道

五會同盟蟲牢

三會伐鄭

同盟馬陵

七來朝 會救鄭

十會伐鄭

九會同盟蒲

葬宣公 曹宣公卒于師曹人使公子負芻守太子欣時逆曹伯之喪負芻殺其太子而自立

十三會伐秦 盧卒于師 成

十五會同盟戚

晉執伯歸京師

十六伯歸自京師

十七會伐鄭 同盟柯陵

會伐鄭

襄元會圍宋彭城 會次鄆二會戚 會戚城虎牢

五會吳戚 會救陳 會鄆九會伐鄭 同盟戲

十會吳祖 滅偃陽 會伐鄭

十一會伐鄭 同盟亳城北 會伐鄭 會蕭魚

十四會會吳向 會伐秦十六會溟梁 大夫盟

十八會同圍齊 負芻卒師武公元

十九葬成公 二十會盟澶淵

二十一來朝 會商任 二十二會沙隨

二十四會夷儀 同盟重丘

二十六會澶淵 大夫盟宋

二十九會城杞 三十會澶淵宋災故

昭元會號 十一會厥慙

十三會平丘 同盟平丘十四勝卒 葬武公 平元

十八須卒 葬平公 悼公元

三十五會黃父 二十七會扈 午卒 聲公元

三十八葬悼公 經自悼公卒至定八年書靖公卒聲公隱公經皆不書傳亦無是史記世家悼公朝于宋宋因之曹立其弟野是為聲公

三十二會城成周 史記世家聲公五年平公弟通弑聲公而

代立是為隱公元年

定四會召陵侵楚 盟臯 馳 史記隱公四年聲公弟露弑隱公代之是為靖公元年

八露卒 葬靖公 伯陽元 十宋樂大心出奔

十一宋樂大心自曹入蕭 十二衛公孟彊伐

十三衛公孟彊伐

哀三宋樂驪伐 六宋向巢伐

七宋圍鄭駟弘救 八宋入以伯陽歸 遂滅曹實伯陽十五

序曹世紀曰曹者文昭之懿親甸伯之貴爵也春秋書曹不

見貶黜之文把以伯爵削而書子秦以伯爵略而從狄穀以
 伯爵斥而挈名獨曹得始終稱伯辭無所變豈非春秋猶示
 假借於曹歟然曹之見於經自交乎中國盟會之外曹事之
 特書者闕焉無幾案公羊謂曹無大夫穀梁謂曹無師何春
 秋又以曹為不足錄而簡之邪嘗考曹國之始末矣其事夏
 盟最謹其與諸侯甚睦不得罪於中國此曹所以無貶文也
 其國趨於僻陋安於偷弱不能自立此曹所以不得詳錄也
 春秋之世陳鄭紀薛之邦其從會有常者未能如曹方齊晉
 主伯列國一離一合而曹之不至者寡矣昭公與會者四共
 公與會者六文公與會者五宣公與會者八成公與會者十
 九武公與會者十二悼公與會者二聲隱二公與會者各一
 可謂事夏盟之最謹矣其會魯者二其朝魯者五其會宋者
 三曰曹人致餼禮也曰曹即位而來見禮也曰五年而再朝

禮也雖更蒙晉宋齊衛之師晉侵者一執者二宋圍者三伐
 者三衛伐者二齊伐者一而曹自伯國會伐之外未嘗敢一
 稱師報復於列國可謂與諸侯之甚睦矣其不得罪者此也
 夫事夏盟之謹則守義而可久與諸侯之睦則得道而多助
 然姬之在列者曹實先亡不及春秋之終其故何哉蓋曹以
 僻陋之習行媮弱之政不能自立非一朝一夕之故矣或曰曹
 嘗病於戎嘗困於晉而其先亡也終始實成於宋自莊曹既
 沒戎實侵曹於是羈以戎出宋以戎歸曹本千乘之邦國有
 冢嫡戎得亂之向也宋之求多於鄭而晉之不得行於邾者
 葢爾之戎乃得以加之於曹是曹之病於戎者然也曹共公
 襄雖以楚方得曹之故晉文實以私怨行焉既入其國復執
 其君復分其田終歲而後復國曹成公負芻雖以殺太子自
 立之罪晉厲遂以汰心執之既列諸會而復重其討二年而

始歸自京師觀曹使侯孺貨盜史以請共公曰合諸侯而滅兄弟非禮也至曹人之請成公其辭尤憂憤不已曰若之何憂猶未弭而又討我寡君是大泯曹也是曹困於晉者然也自曹莊公以齊命會伐宋遂為宋人不釋之憾夫伐宋非獨一曹也而獨仇曹之深以曹在宋之宇下非他國比僖十五年宋人伐曹傳曰討舊怨也且敵惠敵怨不在後嗣何怨之可討乎僖十九年宋人圍曹傳曰討不服也伐齊之役曹南之盟曹既兩從會矣何不服之責乎宣三年宋師圍曹傳曰討武氏之亂也武穆之禍宋實為之豈曹之有罪乎至曹伯陽之衰宋景用師益亟哀三年書宋樂貜伐曹六年書宋向巢伐曹七年書宋人圍曹八年書宋公入曹以曹伯陽歸矣夫六年之間宋師狎至卒以吞曹蓋曹偏於宋其來固久申之會鄭子產曰曹畏宋必不來曹以偏而素畏於宋宋以強

而求多於曹不及并吞寧有已乎是曹之先亡也終始實成於宋者然也然曹苟能以禮義自強其國有賢者相與扶持稍變僻陋之習則曹叔振鐸之澤未泯也豈我能病之晉能困之而宋景遂得滅之哉春秋之道正本而明微反已而不責人謂國之存亡皆其自致者也善乎鄭渾罕之言曰曹其先亡乎偏而無禮夫禮義明則國不畏偏禮之不立偏而必傾非獨宋景之罪也曹之衰政不詳於春秋嘗觀諸詩矣蟋蟀則刺昭公好奢而任小人無法以自守下泉則疾共公侵刻下民不得其所鳴鳩則刺其在位之無君子候人則刺其近小人而遠君子嗚呼此曹亡國之階也夫曹之四詩三詩刺其弃君子用小人禮義自君子而出者也君子不用何以望其有禮以自強是以曹共公有僖負羈之賢不能知而乘軒者乃三百人曹成公有子臧為曹國社稷之鎮公子不能

用而俾之盡致其邑與卿而不出曹伯陽惑田弋鄙人公孫疆之謀妄聽辯言而亂舊政背晉奸宋自取滅亡而不悟孟子曰不信仁賢則國空虛無禮義則上下亂國既僻陋而空虛且亂其能有存邪至是而後知春秋以曹為不足錄之意也

三列國同姓世紀 衛

衛康叔之後康叔武王之幼弟也成王分殷餘民封康叔于河淇之間實伯爵夷王始命頃侯至武公復受命為公凡十三世當桓公十三年實魯隱公元年春秋始終衛十一公迄于出公五十二年由出公以降十三世而秦併衛

隱元 桓十三

二鄭伐

四州吁弒君完 伐鄭 伐鄭 殺州吁于濮 立晉

宣元 衛以天子之近郊創為大變而宋魯陳蔡之君縱不能討反連兵以張其勢夫獨無君父之心哉春秋兩書伐鄭詞繁而不殺其法不獨

在州吁矣

八遇垂 盟瓦屋

五葬桓公 入郕

十入鄭 伐戴

桓三胥命蒲

五從王伐鄭

十會桃丘弗遇 來戰郎 十一盟惡曹 鄭忽出奔

十二晉卒 惠公元 立五年 出十八年復入

十三及魯紀鄭戰敗績

葬宣公

十四宋以伐鄭

十五會袤伐鄭

十六會曹 會伐鄭

朔出奔齊 公子黔年立

十七伐邾

莊三溺會齊伐

五會齊宋陳蔡伐

六王人子突救 朔入 放黔年 至伐 齊來歸俘

十四會鄆

十五會鄆

十六伐鄭 會同盟幽

二十五朔卒 懿公元

二十八齊伐及戰敗績

戰於澤遂滅衛衛遺民立戴公卒而立文公

文公元

閔二狄入

四會侵蔡伐楚 會侵陳

僖二城楚丘

六會伐鄭圍新城 救許

五會首止

九會葵丘 盟葵丘

八會盟洮

十三狄侵 會鹹

十温子奔

十五會盟牡丘 次匡 救徐

十四城緣陵

十八伐齊 邢狄伐

十六會淮

二十一狄侵

十九伐邢

二十五燬滅邢 燬卒 成公元

二十二伐鄭

二十六盟向 伐齊

葬文公 盟洮

楚救 出奔楚

二十八晉伐

會盟踐土 叔武 鄭自楚復歸 元咺出奔晉

晉執歸京師

元咺自晉復歸

三十殺大夫元咺及公子瑕 鄭歸衛

三十一狄圍 遷帝丘 三十二侵狄 及狄盟

文元晉伐 伐晉

三會伐沈

四甯俞來聘

七盟扈 衛侯會趙盾

九會救鄭

十三會沓 狄侵

十四會同盟新城

十五盟扈 衛侯

十七伐宋 會扈

宣元晉放大夫胥甲父 會棐林伐鄭 趙盾

二侵鄭 六孫免侵陳

七孫良夫來盟 會黑壤 九會扈 鄭卒 穆公元

十齊崔氏出奔 伐鄭 十二同盟清丘 救陳

十四殺大夫孔達 十七會同盟斷道

十八世子臧伐齊

成二及齊戰新築敗績 孫良夫及齊戰鞏齊敗績

速卒 定公元 盟蜀 三會伐鄭 葬穆公

孫良夫伐廡咎如 孫良夫來聘 及孫良夫盟

五會同盟蟲牢 六孫良夫侵宋

七會救鄭 同盟馬陵 孫林父出奔晉

八來滕 九會同盟蒲

十弟黑背侵鄭 會伐鄭 十二會瑱澤

十三會伐秦 十四荀林父自晉歸 會同盟戚

臧卒 獻公元 會同盟戚

會會吳鍾離 十六會沙隨

十七北宮括侵鄭 會伐鄭 同盟柯陵 會伐鄭

十八會同盟虛打 公孫剽來聘

襄元會圍宋彭城

二侵鄭 會戚 會戚 城虎牢

三會同盟雞澤 大夫及陳袁僑盟

五會吳善道 會吳戚 會救陳

七宿如 孫林父來聘 及盟 會鄆

八會邢丘 九會伐鄭 同盟戲

十會會吳桓 會伐鄭 同盟亳城北

會伐鄭 會蕭魚 十四會會吳向 會伐秦

出奔齊 殤公元 會戚 十七會湫梁 大夫盟

會伐許 出奔晉 十六石買伐曹

十八晉執石買 會同圍齊

十九盟祝柯 孫林父伐齊

二十會盟澶淵 三十一會商任

三十二會沙隨 三十三齊伐

三十四會夷儀 入夷儀 三十五會夷儀 同盟重丘 三十六甯喜弒君 剽

孫林父入戚叛 衍復歸衛 晉執衛甯喜 弟鱣出奔晉 大夫盟宋

三十七會宋 殺大夫甯喜 三十八石惡出奔晉 二十九衍卒 襄公元

昭元會晉楚虢 會城杞 葬獻公 六宋華合比出奔 十一會厥憇

七惡卒 靈公元 葬襄公 十三會平丘 同盟平丘 十八宋衛陳鄭災

二十盜殺兄縶 三十五會黃父 三十二會城成周 定四會召陵侵楚 盟皐鼬 伐鮮虞

七晉執結以侵 盟沙 八晉士鞅侵 斯何忌侵 盟曲濮 九次五氏

十晉趙鞅圍 會安甫 十二公孟彊伐曹 十三次垂葭 公孟彊伐曹

十四公孫戍來奔 趙陽出奔宋 北宮結來奔 會牽 世子蒯瞶出奔宋

公孟彊出奔鄭 十五次渠蔭 哀元伐晉 二元卒 出公元

晉趙鞅納蒯瞶于戚 葬靈公 三圍戚 五晉趙鞅伐

七晉魏曼多侵 十公孟彊自齊歸 十一世叔齊出奔宋 十二會鄭

十三晉魏曼多侵 序衛世紀曰春秋諸侯姬在列者衛獨後亡何邪以同姓之

尊封疆之大雖在叔世遺澤未泯尚為列國之望二百四十二年之間兵爭之可見者最少賢人君子之著聞者特多介於齊晉大國之間偏而未至於失國良有以也然禮義消亡變故繁興衛之為衛亦有可得而考者吾觀魯以周班而後鄭於衛晉人載書踐土而先衛於蔡衛為同姓之尊可知也受三監之舊竟分七族之餘民封畛土疆始於武父之南至於圃田之北實方伯連帥之地隱公之初以鄭視衛亦曰衛實難也成公以後以晉敵衛猶曰衛不得為次國也末年襄靈之衛至無足道而其出猶可以當晉之千乘入猶可以受晉之五伐豈非其封壤之大有足以自植立者歟異時數大國之爭監未嘗不以得衛為重自齊桓首倡伯事盟會屢舉而十六年之勤始能得衛晉又踵桓之迹舉動稍異而更五會之信卒未能以致衛其不輕向背如此當春秋之始從王

之舉猶曰正也在春秋之終越國之謀猶曰古也不特此爾楚虔稱伯于申而問召陵之典諸侯楚實有之矣衛獨能從容與晉卻楚吳夫差端冠委於黃池以襲成周之籍吳子在而諸侯莫敢不至矣衛亦卒晏然與晉而辭吳蓋其流風遺習尚存所以為列國之望歟乃若中國同好莫不與者亦槩可考而惠公之與會者二文公之與會者六成公之與會者二穆公之與會者七獻公之與會者二十五靈公之與會者四自其從齊晉以有事於兵革之外而稱師修怨如伐鄭入郟治曹盟邢不過數事非兵爭視他國最少歟名卿才大夫其可稱者殆不勝計秉翟之人可為王官終襄之士皆為忠臣當獻公之世有事君不二者有能贊大事者有能撫內而營外者季札所以稱其無患者也靈公之世治宗廟有人治軍旅有人治賓客又有人孔子所以稱其奚喪者也夫其季世

而人才之見於百執事者猶且若是則干旌之賢臣淇與之君子其稱於當時者亦可想也非人才視他國猶多歟夫以王德之親受成國之壤而家法未墜獨有以自異於時兵爭之少猶足以輯寧其民人才之多猶足以維持其國蓋魯衛之政兄弟也魯居儒書秉禮之邦春秋之稱望國未嘗不曰魯衛意者康叔武公之治衛亦猶周公伯禽之在魯其典刑文獻隱然未忘固應有是宜其偏於齊晉奔走於強令能據其地執其君臣而未敢於亡其國也雖然禮義消亡變故繁興故更世雖多而爭端不息立國雖久而根本寔搖東門之亂州吁始禍熒澤之變孽朝召釁衍剽並爭適庶舛也孫甯專制上下紊也鱗紮蒙禍兄弟乖也崩輒出入父子睽也觀詩人記衛之風自頃至文三十有八詩而言男女夫婦者居三之二則本其亂亡之由抑可見矣夫三綱五常立國之本

而淪斃如此衛之有名無情其來豈一日之故昔之間衛風者曰吾聞衛康叔武公之德如是是其衛風乎吁豈非康叔武公之澤源流深長必至於陵夷極盡而後衛從之歟不然孟子所謂無禮義則上下亂衛之後亡幸哉

〔四〕列國同姓世紀 晉

晉唐叔之後也唐叔武王之穆始封夏墟閔十世而文侯仇輔周東遷以受圭瓚之賜又四世至鄂侯二十年實魯隱公元年六世而文公伯諸夏自是晉主齊盟者十一君迄于定公三十一年乃魯哀十四年自文至定事見晉伯紀其未伯已前事別為晉紀云

〔隱元〕

鄂侯二年 初晉文侯成師封于曲沃邑大二翼 郟也君桓叔卒莊伯立 弒孝侯晉人立 侯卒莊伯代之平王使魏公伐曲沃晉人立哀侯

〔五〕

哀侯元 晉侵陸渾陸渾與曲沃武公謀伐晉 虜哀侯晉人乃立哀侯小子為君

〔桓三〕

晉侯緡 曲沃武公伐晉侯緡滅之周僖王命曲沃 武公為晉君列於諸侯於是盡併晉地

莊十六

元武公

曲沃武公在位二十七年周僖王命更號曰晉武公始都晉國武公者晉穆曾孫曲沃桓叔孫也自桓至武公凡六十七年代晉為諸侯

十八

元獻公

獻公八年晉始用士為說冬殺故晉之羣公子始都絳

僖二滅下陽

五殺世子申生

執虞公

八狄伐

九侂諸卒

里克殺君子奚齊

十里克弑君卓及大夫荀息

殺大夫里克

十一殺大夫平鄭父

十五及秦戰韓獲晉侯

是歲作爰田晉侯歸作州兵秦始位晉河意置官司焉二十三年惠公夷吾卒位公子圍立二

十四年秦伯納晉重耳殺懷公下高梁秦伯納之送衛於晉三千人實紀綱之僕

二十四夷吾卒

文公定而復次懷公元 文公元

三十七

蒐于被廬作三軍謀元帥明年始伯

二十五王入于王城晉侯朝王圍原

序晉世紀曰晉之為國舊矣入春秋逾六十年昉見於經僖二年晉滅下陽是也晉以武穆之近親受陶唐之與都冠冕乎侯伯之列而書法之詳乃不得與鄭衛同日鄂侯二年為

春秋之始及乎重耳以前凡六世矣按左氏晉之策書登載至繁非無可繫之事也周之東遷曰晉鄭焉依非無可錄之功也武公代興事端轉轉非無可紀之變也春秋皆略而不書八十餘年間晉事之存乎經者僅十見不過執滅之暴誅弑之惡戎狄戰伐之辱而已夷攷諸傳桓二年曲沃伐翼七年春曲沃誘晉小子侯殺之八年春滅翼冬王命哀侯之弟緡于晉莊十六年冬王命曲沃伯為晉侯此非變端之可紀歟莊十八年春晉侯朝王晉侯使原莊公逆王后于陳僖十一年晉侯平戎于王非其功之可錄歟莊二十六年夏晉城絳閔元年晉作二軍晉伐臯落氏僖十五年晉作爰田晉作州兵冬晉侯歸自秦二十四年秦伯納重耳此非事之可繫歟聖人作經何削之若是其嚴春秋之法所以代一王之賞罰存萬世之綱常曲沃滅翼友孽之逼輒傾宗國東周刑政不

行反加寵命彝倫攸斁人紀何觀子孫象之遂有里克之亂申生之禍君臣父子不能相保由傳攷經則知聖人微其事而不書存其惡而自著撥亂反正之道反覆晉事而可觀及觀列國之詩晉風自蟋蟀而下十有二篇皆僖昭武獻之詩自重耳而後咸缺焉蓋詩與春秋詳略互見褒貶自章以武獻之事不足錄乎春秋也故詩特詳之椒聊則言曲沃之強盛蕃衍而曲致其隱傷之辭無衣則著武公之并國不安而極道其愧惕之情杜采苓等詩無非刺其行事之非凡晉人之悖理傷道春秋略之者觀乎國風可以參見矣武獻之為國非不盛也當齊桓九合之時晉之君大夫不交於盟會葵丘如會不至而還晉以不義得國方新歉歉乎懼人之有辭於已也是以阻居深山戎狄與鄰禮樂之事曾無聞焉至乎重耳之伯而後改物遂能駕楚世主夏盟然重耳復國之初經猶未之錄也僖二十五年晉侯朝于王城無以異乎朝于王所也晉侯圍原無以異乎遂圍許也皆不得見於經重耳入國雖正未受天子之命亦猶武公耳故僖二十七年以前晉事不著乎春秋者聖人扶人紀存綱常之法二十八年以後晉事詳列乎春秋者聖人憂中國錄伯功之例也

〔五〕列國同姓世紀 鄭

鄭之始封自桓公桓公乃厲王之昭宣王之弟也自桓公寄帑於虢會武公從王東遷卒定其地而食溱洧焉莊公繼立二十二年當魯隱公元年實春秋之始閱世十四至聲公二十年當魯哀公十四年為春秋之終聲公以降歷七世而韓滅鄭

〔隱元〕莊公二十三 克段于鄆

〔三〕盟石門

〔二〕伐衛

〔四〕宋陳蔡衛伐 翬會伐

五宋伐圍長葛

六來渝平

八宛來歸祊 我入祊

十會中丘 會伐宋

宋衛入 宋蔡衛伐戴

伐取之 入郕

十一會時來 入許

桓元會垂 璧假許田

盟越

二會稷成宋亂 會鄧

五如紀 蔡衛陳從王伐鄭

繻葛之戰射王中肩

十來戰于郎

十一盟惡曹 寤生卒

葬莊公 厲公元

宋執祭仲 突歸

忽出奔衛

十二盟武父 伐宋戰宋十三及四國戰四國敗績

十四會曹 弟語來盟 宋以四國伐

十五突出奔蔡 世子忽復歸 突入櫟

四國會袤伐 十六會曹會伐至伐

十七 高渠彌弒昭公立公子亶

十八 齊人殺子亶祭仲立鄭子于陳而立之

莊四遇垂

十四會鄆 厲公復元 厲公自將侵鄆 傅報殺鄭子而立厲公

十五會鄆

十六宋齊衛伐 荆伐

會同盟幽

十七齊執詹 詹自齊逃來

三十一突卒 葬厲公 文公元

二十七會同盟幽

二十六荆伐 會齊宋救

二十九侵許

閔二棄師

僖元楚伐 會櫪

二楚侵

三楚伐

四會侵蔡遂伐楚次陘

會侵陳

五會首止盟首止

六會伐圍新城 至伐

七齊伐 殺大夫申侯

會世子華盟甯母

八盟洮 乞盟

九會葵丘 盟葵丘

十三會鹹

十四城緣陵 狄侵 十五會盟牡丘次匡救徐

十六會淮 十九盟齊

二十一會孟

二十二宋衛許滕伐 二十四狄伐 天王出居

二十七圍宋 盟宋 二十八會盟踐土 會温

圍許 三十秦晉圍

三十二捷卒 穆公元 三十三伐許

文二會盟垂隴 三會伐沈 九楚伐 晉救

七會盟扈 鄭伯 十四會同盟新城

十三會斐 十七伐宋 會扈

十五盟扈 鄭伯 宣元侵陳遂侵宋 四國會晉栢林伐 晉宋代

二宋及戰大棘宋敗績 四國侵

三楚侵 蘭卒 葬穆公

四歸生弒君夷 襄公元 楚伐 五楚伐

七會黑壤 九會扈 楚伐 晉救

十四國伐 楚伐 十一盟辰陵

十二楚圍 十四晉伐

成二侵衛 盟蜀 三四國會伐 至伐

去疾伐許 伐許 葬襄公

伐許 五會同盟蟲牢

六費卒 成公元 楚嬰齊伐 晉藥書救

七楚嬰齊伐 九國會救 同盟馬陵

九會同盟蒲 晉執伯 藥書伐 圍許

十衛弟黑背侵 六國會伐 是歲鄭人改立君四百 侯伐鄭而歸其君

十三會伐秦 十四喜伐許

十五會同盟戚 楚伐 十六喜侵宋 戰鄆陵敗績

尹子四國會伐 十七衛北宮括侵

尹單七國會伐同盟柯陵 單子七國會伐 至伐

十八伐宋 侵宋

襄元晉韓厥伐 二伐宋 踰卒 僖公元

晉宋衛侵 會戚 會戚遂城虎牢

三會同盟雞澤及袁僑盟 五發來聘 會吳戚

會救陳 七會鄆髡頑未見卒于鄆

簡公元 八葬僖公 侵蔡獲燹

會邢丘 楚貞伐 九十二國會伐 同盟戲

楚伐 十伐宋 十二國會伐

盜殺駢發輒 戈鄭虎牢 楚貞救 至伐

十一舍之侵宋 十二國會伐 同盟臺城北 至伐

伐宋 十二國會伐會蕭魚 楚執良霄

十四十三國會會吳向 十三國會伐秦 七國會戚

十六十一國會渙梁大夫盟 十八會同圍齊 楚午伐

十九盟祝柯 殺大夫嘉 二十會盟澶淵

二十一會商任 二十二會沙隨

二十四會夷儀 楚蔡陳許伐

二十五會夷儀 舍之入陳 同盟重丘 夏伐陳

二十六會澶淵 楚蔡陳伐 二十七會宋 大夫盟宋

二十九十一國會城杞 三十良霄出奔許 自許入

殺良霄 十二國會澶淵宋災故

昭元晉楚十一國會號 三殺大夫黑

四會申 十一會厥憇

十二嘉卒 定公元 葬簡公 十三會平丘 同盟平丘

〔十八〕宋衛陳鄭災

〔三十五〕會黃父

〔二十八〕寧卒獻公元

葬定公三十二年十一國會城成周

〔定四十八〕國會召陵侵楚

盟臯鼬 楚囊瓦出奔

〔六〕游速滅許以斯歸

公侵 至侵

〔七〕盟鹹

〔八〕晉士鞅侵 盟曲濮

〔九〕薑卒聲公元

葬獻公 〔十〕會安甫

〔十一〕及平 叔達如荏盟 〔十四〕公孟軻出奔

〔十五〕罕達伐宋

〔哀二〕晉趙鞅及罕達戰鐵鄭敗績

〔七〕宋皇瑗侵

駟弘救曹九 宋皇瑗取師雍丘 宋伐

〔十〕宋伐

〔十一〕陳轅頗出奔

〔十二〕宋向巢伐

〔十三〕罕達取宋師于岳

序鄭世紀曰觀春秋之世變於鄭蓋可觀矣鄭之為國邇於

周畿而介乎齊晉楚之間方其初也一舉動而係王朝之輕重及其後也一向背而關夷夏之盛衰鄭固春秋要領之國然鄭在隱桓之春秋王室之罪人在莊僖以後之春秋伯者之罪人也在襄昭以後之春秋當時諸侯之罪人也觀周桓公言於王曰我周之東遷晉鄭焉依王子朝告於諸侯之辭亦曰惠襄之難則有晉鄭咸絀不端鄭疑未有罪於王室也然由君子之論夾輔之績不足以贖交惡之誅綏定之美不足以掩敵戰之惡況入春秋以來未有言克其弟者而克段之舉始冒周官賊親之刑未有言伐人國者而伐衛之師始蹈敵國相征之禁未有言歸人邑而歸祊之謀始犯諸侯專地之戒當是之時列國爭兵曾未有先莊公以詭譎之雄日爭尋常以盡其民蓋未足論也而殲天倫墮王法之大者皆昉於鄭焉以先王之禮攷之鄭豈非王室之罪人歟莊僖之

後王政日微矣。堅事伯主，以蕃王室，是猶愈於事楚也。而鄭之君臣，念不及是，借曰泓不振旅，是宋襄之所以失鄭必不復從。是晉景之所以不克爭鄭，隸林之役，伐而不從，猶曰晉實不競。鄢陵之役，勝而不服，猶曰晉實不德。而盟幽未幾，亟有鄭詹之執，召陵既退，尚勤新城之圍，是何邪？又況戰城濮之明年，遂敢於背翟泉之盟，城虎牢之十載，姑黽勉聽命於蕭魚之集，以為晉楚之間強。今是從則文公一戰之威，非楚匹矣。以為晉楚無德來者，是與則悼公五會之信，非楚敵矣。鄭何難於背楚？何易於奔晉？若是哉，是則從楚者鄭之欲也。昔成王命大公曰：五侯九伯，女實征之。平王命文侯曰：與鄭夾輔周室。母廢王命，以先王之訓，攻之鄭，又豈非伯者之罪人歟？然襄昭以後，宋盟申會，諸侯兩屬於晉楚者二十餘年，自是晉楚俱弱，無力爭之事。鄭宜有以立國矣，而復附齊衛。

抗晉宋終歲勤動，迄無所成，攷其一國之政，乃冥冥轉移於七穆之手。蓋子駟之專，移之於子孔子；孔之誅，則移之於伯有；伯有之誅，則移之於子皙；橐車以爭室而不暇問，矯盟以專伐而不能禁，非子產補弊支傾，任忠才斃強侈以救之，鄭之亟亡不待數世之後矣。末年宋公子地之叛，而大夫為老丘之役，以獎地晉趙鞅之亂，而大夫為鐵之役，以助鞅是鄭國惟大夫之所為。當時田氏專齊，三家擅魯，六卿分晉，七穆有鄭，蓋相視而莫相正也。然諸侯無專殺而殺有罪者，與之無外討而討有罪者，善之繩以春秋之法，則鄭又豈非諸侯之罪人也歟？夫以二百四十二年之鄭，君臣上下相與謀其國者，始於上陵終於下抗，中於背華，即夷無一可以為長世保民之道，欲後亡得乎？抑嘗觀之詩鄭風二十有二篇，清人而下五詩皆刺其不能遠小人而近忠賢，雞鳴而下五詩皆刺

其失婚姻之道無室家之節夫不信仁賢則國空虛無禮義則上下亂鄭晉有之矣渾罕之言曰鄭先衛亡偪而無法以經攷之鄭之先亡豈直無法之罪哉

六列國同姓世紀 滕

滕周叔繡之後叔繡為文王之昭周公封建親戚而國之勝入春秋至魯隱公七年滕始見經而不名自文至隱以名通者五君隱公實卒于哀十一年後四年而春秋終

隱七滕侯卒

十一來朝

桓二滕子來朝

莊十六會同盟幽

僖十九宋執嬰齊

宣九滕子卒 文公元

宋圍

十宋伐

成十三會伐秦

十六滕子卒 成公元

襄元會圍宋彭城

二會戚城虎牢

五會吳戚

六來朝

九會伐鄭 同盟戲

十會會吳俎 會伐鄭

十一會伐鄭 同盟亳城北 會伐鄭會蕭魚

十四會會吳向 會伐秦 十八會同圍齊

十九盟祝柯 二十會盟澶淵

二十四會夷儀 同盟重丘

二十九會城杞 三十會澶淵宋災故

三十一來會葬

昭三原卒 悼公元

叔弓如滕 葬成公

四會申

十三會平丘 同盟平丘

十五會黃父

二十七會扈

二十八寧卒 頃公元

葬悼公

定四會召陵侵楚

十五來會葬

哀四結卒隱公元

葬頃公

十一虞母卒

葬隱公

序滕世紀曰滕地不大於邾莒民不衆於紀薛而以文昭之懿戚受侯爵之顯封當隱桓之春秋嘗以侯書於經矣然其始稱爵而沒其名其後稱名而貶其爵是果何邪夫宿男不名以為微之杞侯貶爵以為夷之春秋之所為不足於滕者必有意也滕事不詳於經其本末可考者五君而已其與諸侯之睦事伯主之謹猶可槩見也何謂與諸侯之睦春秋未有書國君會葬他國者而書滕之會于魯者二未有書國君朝於小國者而書滕之朝魯者五自曹莒邢邾之小國其爭城爭地皆嘗從事於干戈之釁而二百餘年間滕獨無稱兵修怨之事其與諸侯可謂睦矣何謂事伯主之謹方齊桓之伯滕之會盟者一宋襄之伯滕之從伐者一晉文之伯迄於

靈成之世滕不一列於經意其國小而福猶未能數從諸侯之事也自晉厲以後凡晉合諸侯一則曰滕之大夫皆至二則曰滕之大夫皆會故文之會晉者一成之會晉者十六悼之會晉者三頃之會晉者一自陳許蔡鄭之大夫其一從一違往往未能一意於中國之好事而六十年間滕獨無盟之不與無役之不從則其事伯主可謂謹矣春秋惡爭鬪重輯睦滕之無爭於諸侯無惡於伯主宜未得罪於春秋也而春秋不足於滕果何意邪以其國之亟亡邪滕之偪於宋畏於齊楚而不能國亦勢使然也宋襄之執滕曰討其不服宋也宋文之圍滕曰討其不事宋也滕誠有罪矣不省其國而執其君不矜其禍而圍其國不幾於無道行之乎至宋之盟叔孫豹曰滕宋私也成周之城仲幾亦曰滕宋役也非其偪於宋者然歟異時滕文公曰滕小國也事齊乎事楚乎故嘗以

之楚而過宋則不惟畏宋而猶畏楚嘗以聞築薛而恐於齊則不惟畏楚而且畏齊是不特惟文之世為然耳自戚之會七國皆在而滕之不至曰以齊故也申之會四國不來而滕之不敢不至曰以楚所及也非其畏於齊楚者然歟然則松柏之下其草不殖滕之亟亡非滕之罪也然滕之亟亡則亦有故矣蓋滕以文王之子孫與魯衛兄弟也故家遺俗流風善政寧無一二之僅存可以保固而持其世哉今觀渾罕之言乃以滕之先亡亦出於偏而無禮滕之弊政雖不詳於經自春秋之初于魯旅見而禮典已紊與薛爭長而班爵已墮喪紀之莫行經界之不正循習僻陋是不一世則典章文物之廢壞其來久矣是以國君無名用狄道也會朝稱子用夷禮也凡先王之餘澤一切淪胥於夷狄而不復見則滕果何所恃以立國乎夫以滕壤地褊小介於數大國之間而無以固其國是春秋之不足於滕也歟

七列國同姓世紀 邢

邢周公之胄也周公弔二叔之不咸而始封焉入春秋六十有一年而見伐於狄齊桓公逐狄人而滅之後一十八年而卒滅於衛

莊三十三秋伐

閔元齊救

僖元次聶北救

遷夷儀

齊宋曹城

十六會淮

十八伐衛

十九衛伐

二十齊狄盟

三十五衛燬滅

序邢世紀曰吾觀於邢而後知亡國之自取也夫邢周公之後嘗為狄所滅矣齊桓城邢而春秋大之則邢衛之宗也而

衛文滅邢春秋宜如何而惡之。經書衛侯燬滅邢衛之罪著矣。雖然列國之事滅人者罪易見滅於人者罪難知春秋之法端本而後末正已而後責人則書邢之見滅於衛邢獨無罪乎觀春秋書邢之本末而求其所以亡則罪之在衛者三在邢者五不可不察也何謂衛之罪懷怨以謀人國罪之一伐本以滅同姓罪之二文公稱有道之君而任二禮殺國子挾詐以掩人之不疑罪之三此罪之在衛者也何謂邢之罪邢方無道衛有令政以邢伐衛是不度德矣邢蕞爾小國而衛為大邢之盟實主乎伐衛是不量力矣衛以文昭之親邢則兄弟之邦不知比衛而數尋師以修怨不親親矣伐齊之役實始於宋釋甌之憾宜不在衛而乃舍宋而治衛是不察有罪矣是雖均之為罪然豺狼之人非我族類忘其世仇而同之於與國即夷謀夏所以深衛之忿而速邢之亡則罪之尤大者歟觀罪之在邢者如此則衛之滅邢豈直衛侯之罪哉詩云駢駢角弓翩其反矣兄弟婚姻無胥遠矣爾之遠矣民胥然矣邢之伐衛其為反也不亦甚乎衛之滅邢其為然也不亦宜乎是聖人之所以書邢之意

〔八〕列國同姓世紀 邢

邢周叔武之後文王之昭也武王克商封叔武於邢按史記世家云武叔其後世無所見其事之書於春秋僅如此

〔隱五〕衛入

〔十〕齊入

〔桓三〕公會杞于邢

〔莊八〕師及齊圍邢邢降齊

〔文十二〕邢伯來奔

序邢世紀曰邢之事書于經者四考其始末一入於衛再入於鄭終圍於齊魯於是而降於齊又七十一年而經書邢伯

來奔遂終春秋無書邾之文吁宋人遷宿是無宿也齊人降
鄆是無鄆也然則邾降於齊其猶有邾歟意者降齊而遂為
之附庸是以久不見于經也然吾觀左氏謂太子朱儒未立
以地奔魯而春秋書伯以尊之則豈其然乎夫專地以叛不
宜沒地因爵以逆不必書爵也庶其竊邑累書間丘曹會專
地特書自鄭入櫟書國著有國也奔衛稱子明不君也朱儒
稱伯豈世子而專邑之稱乎是必不然矣然書朔奔齊罪在
朔也名朱奔楚罪在朱也紀侯去國用以責齊衛侯適楚書
以過晉邾以文昭之懿親受甸伯之貴爵既降於齊而為之
屬亦曰將復五廟以存姑姊妹也而奔國失魯得無罪乎而
春秋曷為不名之也則亦必有故矣邾之託於齊何啻犬豕
遁於餒虎之側不至噬嚙寧有已邪昔滕文畏齊楚而問孟
子孟子告以大王居邾之事以為君子不以養民者害民邾
伯以國屬齊而猶不得免則其之魯也誠未有罪耳雖然大
王居邾而益大邾伯奔魯而益微則大王之事遠矣若夫興
滅國繼絕世是聖人之事春秋書邾伯之爵抑亦周公大封
同姓之意

九列國同姓世紀 微國

傳云武王克商光有天下兄弟之國十有五人姬姓之國四
十人春秋之世存者蓋無幾矣而同姓大國又日以吞併諸
姬為事故見於經者僅如此

桓二取郟鼎于宋 十二公會宋公燕人于穀丘

十三及齊宋衛燕戰

莊十六滑伯同盟幽

僖二虞晉滅下陽 魏邑 五晉執虞公

二十二郟子來朝 共四國

序同姓微國紀曰周家封國八百同姓五十逮乎春秋之始纔三百四十年耳而周之子孫抑何其甚微邪小國弱兵介乎強侯之間僅若黑子之著面而地大民衆以臨蕞爾之國奚啻瘠牛之儷豕故郟畏魯衆齊迫燕弱漢陽諸姬楚實盡之虞虢焦滑霍楊韓魏皆姬姓也晉皆兼之然則周之子孫安得不日失其序乎嗚呼齊楚之人狡焉思啓封疆至於芟夷併吞固無足怪而同姓大國恃其強力亦往往自尋斧於本支何邪吾觀先王之時大比小強比弱同姓無甚強大之國也宜若不足恃而脉絡聯附垂五六百年而未亡春秋以後小并於大弱并於強同姓無甚弱小之國矣宜可以久立而卒之肱解分披不能一二百年而天下無復周之子孫論至於此則先王大封同姓之意大小相維之制所以爲保民長世之道豈可誣哉豈可廢哉

十列國先代之後世紀 陳

陳舜之後也周武王克商始封媯滿於陳是爲胡公閔世十一至桓公二十有三年爲魯隱公元年春秋終始陳十二公當魯昭公八年楚師滅陳五年而復封迄閔公十九年實魯哀十四年後十五年而卒滅於楚

隱元 桓二十三年

桓二 會稷成宋亂

四 伐鄭 鞏會伐鄭
五 甲戌己丑鮑卒 厲公元

甲戌己丑猶十二月再書丙戌也或曰諸侯多有曆如宋用商曆晉用顓曆魯用周曆日之差或者曆之異歟

葬桓公 從王伐鄭

六 殺佗 桓公元

十一 會盟折

十二 躍卒 莊公元

十四 宋以伐鄭

十五 會袤伐鄭

十六 會伐鄭

莊元 林卒 宣公元

二 葬莊公

四遇垂

五伐衛

八次郎以俟

十三會北杏

十四伐宋

十五會鄆

十六會同盟幽

十九結媵婦于鄆

伐我西鄙

二十二殺禦寇敬仲奔齊

二十五女叔來聘

二十七會同盟幽

友如陳葬原仲

僖四會侵蔡伐楚 齊執轅濤塗 及江黃伐 會侵

五會首止 盟首止

六會伐鄭圍新城遂救許

七會盟甯母世子款

八會盟洮

十二杵臼卒穆公元

十三葬宣公 會鹹

十四城緣陵

十五會盟牡丘 大夫救徐

十六會淮

十九會盟齊

二十一會孟 會盟薄

二十二楚伐

二十五楚圍納頓子

二十七圍宋 盟宋

二十八踐土如會 款卒共公

陳子會溫遂圍許

二十九會盟翟泉

三十三伐許

文二會盟垂隴 伐秦

三會伐沈靈公元

六行父如

十三朔卒陳侯

十四會同盟新城

十五盟扈傳陳侯

宣元楚侵 晉救

會棐林伐鄭

二侵鄭

六晉趙盾衛孫免侵

八楚伐

九殺大夫洩冶

十夏徵舒弑君平國陳夏舒弑君而自立明年楚殺夏舒乃復封陳

十一盟辰陵 楚殺夏舒 楚入納公孫寧儀行父成公元

十二葬靈公

宋伐 衛救

成二盟蜀

陳人

襄三雞澤表僑如會大夫盟

四年卒

哀公元

葬成公

圍頓

五會吳戚

戎陳

楚貞伐

會救 至救

七楚貞圍

會鄒

逃歸

十七宋伐

二十三殺大夫虎寅

弟黃自楚歸

二十四楚蔡陳許伐鄭

宜咎出奔楚

二十五鄭舍之入陳

鄭夏伐

二十六楚蔡陳伐鄭

二十七孔奐會宋

昭元會晉楚虢

四楚會申

楚八國伐吳

五楚八國伐吳

八弟招殺世子偃師

溺卒

楚執于貞師殺之

留出奔鄭

殺大夫過

楚滅執招放越殺孔奐

葬哀公

傳楚滅陳立穿封成爲陳公後三年楚滅陳蔡城陳

蔡不羹平王即位後封陳蔡立陳公之子吳爲陳侯

九叔弓會楚于陳

陳災

十三吳歸于陳

惠公元

自哀公六年五年而惠公立

十八宋衛陳鄭災

三十三吳敗六國師于雞父獲

夏翬

定四吳卒

懷公元

會召陵侵楚盟臯鼬

葬惠公

十四楚陳滅頓以牂歸

哀元圍蔡

六吳伐

九楚伐

十楚結伐

吳救

十三楚伐

盜殺夏區夫

序陳世紀曰春秋諸侯迫於從夷者陳蔡一也春秋書蔡事爲特略其始末可見者惟六君陳十二公悉著于冊稽其行事視蔡尤詳焉聖人不少假借於宗盟之長而獨未深貶絕於胡公之陳是何邪陳國於荆河之地實邇強楚而遠齊晉其汙於荆蠻或者非其得已試考之經其靈以前陳之事中

國者十九成衰以後陳之事中國者十一陳之堅於事楚大抵不得不畏楚而中國之易於失陳往往自不能以有陳爾何者陳在春秋之始從王伐鄭猶修勤王之職盟折會稷猶與諸侯玉帛之好伐衛伐鄭猶借諸侯兵車之會齊桓之伯自盟幽以至於會淮其從齊者九晉文之伯自踐土以至於翟泉其會晉者三濤塗雖執而首止之盟猶列陳侯穆公雖卒而溫之會猶序陳子獨宋襄之暴陳始從楚而會孟之後屢動楚人之兵晉靈之懦陳再與楚而隸林之後始荐勤晉師之討非共靈以前陳之從中國嘗十九歟自少西之難晉不加討楚遂得以專辰陵之盟邲之役晉不振旅宋曾不得以實清丘之言於是陳一意向楚矣蜀之役借曰竊盟而雞澤之集奚復後會乃至會戚以成陳固悼公之勤陳也會棗城以講陳固悼公之勤陳也而圍頓之師雖嘗勇於從晉非為

之行乃尋快於與楚何邪異時歸黃于陳惟曰楚故戮一虜於陳亦惟曰楚故招之放過之誅亦惟曰楚故伐鄭伐吳惟楚是贊會申會虢惟楚是從甚而陳之滅陳之封亦惟楚令是聽蓋無異楚之鄙邑矣末年夫差爭伯陳不從楚則又移於從吳終春秋之世獨召陵一會暫從於晉他無聞焉非成衰以後陳之從中國者十一歟然楚人爭陳之迹不見於齊晉方盛之時而陳人從楚之事乃疊疊相繼於晉楚爭衡之日則亦可以求其故矣大抵中國之不抗於楚其說常有二焉志怠者不能為力弱者不敢為也吾觀范宣子之言曰楚人改行而疾討陳陳近於楚民朝夕急能無往乎於是不復有事於陳夫晉君方明六卿無缺不能張其威以治楚而安於存陳者怠孰甚乎中行穆子之言曰不能救陳又不能救蔡物以無親晉之不能又可知矣於是始欲舍陳而救蔡而

偃師蒙禍國內無討不能明大義以懷陳而甘於不敢抗楚
 晉弱孰甚乎由是觀之陳不得不畏楚往往亦中國之自不
 得以有陳也明矣是則陳以神明之後為周建國汚於荆蠻
 亦可以察其情矣茲春秋所以書陳之事獨異於蔡而不至
 於甚略之歟雖然陳之所以自立其國者果何如邪夫禮義
 苟明國不畏偏陳之敝政見於經者不一而詩之所載尤深
 切著明焉蓋陳風九詩言君臣上下之淫亂者七以蕞爾之
 陳在荆尸之宇下而立國如此是何怪其奔走於強令而不
 知存夏即戎之為恥哉昔滕畏齊楚而孟子告以為善蔡偏
 於楚曹滕偏於宋而渾罕皆歸咎其無禮使陳人不失其治
 國之道無根本先撥之憂則國無小不可易也荆楚雖大何
 畏乎

十一 列國先代之後世紀 杞

杞夏后之餘也武王克商封東樓公於杞八世為惠公實當
 春秋之初又八世而春秋終又八世而杞亡實見滅於楚後
 陳之滅三十四年

隱元 惠公

四 莒伐取牟婁

桓二 來朝 入杞

三 會郟

十二 會盟曲池

二十七 會伯姬洮 伯姬來

莊二十五 伯姬歸

來朝 杞人春秋稱侯至是稱子 杜注云為時王所黜

十三 會鹹 傳淮夷 病杞故

僖五 伯姬來朝其子

十四 城緣陵 遷杞

二十三 杞子卒 傳書曰子 杞夷也

二十七 來朝 用夷禮 故曰子 遂入杞

二十八 伯姬來

三十一 伯姬來求婦

文十二 來朝

成五叔姬來歸

會同盟蟲牢

七會救鄭

同盟馬陵杞桓公

八叔姬卒

九伯來逆叔姬之喪以歸

會同盟蒲

十八來朝

襄元會次鄆

六姑容卒 葬桓公

九會伐鄭 同盟戲

十會會吳桓 會伐鄭

十一會伐鄭 同盟亳城北

會伐鄭 會蕭魚

十四會會吳向 會伐秦 十六會湟梁 大夫盟

十八會同圍齊 十九盟祝柯

二十會盟澶淵 二十三會沙隨

二十三會卒文公元 葬孝公 二十四會夷儀

二十五會夷儀 同盟重丘 二十九會城杞 來盟

三十會澶淵宋災故

昭六益姑卒平公元 葬文公 十一會厥慙

十三會平丘 同盟平丘 二十四郁釐卒悼公元 葬平公

二十六會盟鄆陵 三十二會城成周

定四會召陵侵楚盟臯鼬伯卒于會僖公元 葬悼公

哀八過卒僖公元 葬僖公

序杞世紀曰春秋之法中國而夷狄者夷狄之所以辨內外
 正名實也吳以大伯之後或貶而稱國楚以熊繹之後或黜
 而書州晉武穆也而或挈晉鄭厲昭也而或挈鄭凡以狄之
 云耳杞先代之後而即東夷豈非春秋之所甚貶歟然考之
 經杞之書子者二侯者三人者五伯者二十八筆削褒貶若
 無定法何也以爲時王之所予奪歟則是禮樂征伐猶出於
 天子而不爲東周矣以爲因魯史之記而無增損歟則是進
 退賞罰無假於聖人而習讀問傳者無所質正矣聖人之且

進且絀者豈無意哉觀杞之為國偏於莒困於夷自桓公以前獨有魯好孝公以後咸從晉役亦諺所謂蕞爾國也何則春秋之初牟婁之取見陵於莒而曲池之平借助於魯夫伐而不敢怨乃求好焉是其偏於莒可知鹹之會諸侯盡行為謀杞故緣陵之城諸國雜至亦為謀杞故凡以淮夷之病杞而謀之則其困於夷可知也一入於魯而因以求成再朝於魯而繼以蒙討君之朝者六子之朝者一婚姻之好相繼於再世赴告之禮不替於七君蓋後乎桓公則無是也乃若晉自文公之伯猶未嘗勤杞於一役景公之伯亦僅能致杞於三會而悼公以後從於盟者八從於會者十有五鄆之次遂能舉偏師以勤伯成周之役遂能偕列國以獎王蓋前乎孝公亦未有是也攷其與四國離合去就之故雖未免於畏偏而周旋於鄰好奔走於伯令猶未至得罪於中國是聖人所為不盡貶於杞歟曰非也杞先代之後而即東夷文獻不足證聖人深惜之當春秋之季微之小邾猶能誦成王之雅夷之為郊尚能歷記少皞之名官宋先王之後賓祭之禮未至遽亡魯周公之子孫易象春秋之書卓有可見杞亦先代之嗣耆老之賢文物典章之懿亦常有一二之足證者乎左氏曰杞用夷禮蓋其習夷久矣試嘗觀經自莊僖以來會于洮而室家之禮廢朝其子而朝廷之禮廢求婦於魯婚禮失矣逆喪於魯喪禮舛矣先代舊章無一可攷猶謂國有人乎春秋不貶之則即夷也 可以不貶遽起而絕之則以先代之後不忍絕也故書侯書伯書子書人因其善惡而著之春秋之法行而聖人之情見矣不然杞以夏用夷春秋何不直夷之而且進且絀哉

〔十二〕列國先代之後世紀 宋

宋微子之後也周公誅武庚分殷餘民封微子於宋傳十三世當穆公七年為魯隱公元年春秋終始宋十三公迄於景公三十六年實魯哀公十四年自景七世偃僭稱王齊魏楚共滅之襄伯中國事在宋伯襄紀餘別為宋世紀云

隱元 穆公七 盟宿

三和卒 殤公元 葬穆公

四遇清。四國伐鄭 翬會伐

五邾鄭伐 伐鄭圍長葛六取長葛

八遇垂 盟瓦屋 十翬會伐

公敗宋管取郟取防 三國伐戴鄭伐取之

桓二督弒君與夷及大夫孔父 莊公元 會稷成宋亂

取郟大鼎于宋 十一執鄭祭仲

會盟折會夫鍾會闕 十二會盟穀丘 會虛會龜

及鄭伐宋戰宋 十三公會紀鄭及戰敗績

十四以四國伐鄭 十六會曹 會伐鄭

十七及宋衛伐邾

莊二馮卒 閔公元 三葬莊公

五五國伐衛 十侵宋 遷宿

齊宋次郎敗乘丘 十一敗郟 大水

十二萬弒君捷及大夫仇牧 萬出奔陳 桓公元

十三會北杏 十四齊陳曹伐 單伯會伐

會鄆 十五會鄆 伐郟 鄭侵

十六伐鄭 會同盟幽 十九結及齊宋盟

伐我西鄙 二十六會伐徐

二十七會同盟幽 二十八會救鄭

三十二遇梁丘

宋大水魯往弔災故書救災恤鄰先王所以一天下也列國之所以通行而不可已者許不弔災君子知其先亡春秋之世猶有先王之遺風者數事若

弔災若賑糴若兵交使
在其間若仇國會葬

僖元次聶北救邢 城邢 會榿

二盟貫 三會陽穀

四會侵蔡伐楚盟召陵 會侵陳

五會首止 盟首止 六會伐鄭圍新城救許

七會盟甯母 八會盟洮

九御說卒 襄公元 會葵丘宋子盟葵丘

十三會鹹 十四城緣陵

十五會盟牡丘次匡大夫救徐 伐曹

十六隕石五六鷓退飛過都 會淮

十八年至二十三年事見宋伯襄紀

二十四 成公元 蕩伯姬來逆婦 殺大夫

二十七楚圍宋 會盟宋 二十八晉執曹畀宋戰城濮楚

敗績 會盟踐土 會溫 遂圍許

三十九盟翟泉

文二會盟垂隴 三會伐沈 雨螽

七王臣卒 昭元 殺大夫 會盟扈

八殺大夫司馬 司成來奔

九會救鄭 十狄侵

十一遂如宋 十四會同盟新城

子哀來奔 十五司馬華孫來盟

會扈 傳宋公 十六宋人弒君杵臼 文公元

十七晉衛陳鄭伐 會扈 平宋

宣元楚侵 會棗林伐鄭 伐鄭

二華元及鄭歸生戰大棘 宋敗績獲華元

四國侵鄭 三圍曹

〔七〕會黑壤

〔九〕會扈 圍滕

〔十〕伐滕 四國伐鄭

〔十二〕同盟清丘 伐陳

〔十四〕楚圍

〔十五〕歸父會楚于宋

及楚平

〔成二〕鮑卒 共公元

楚盟蜀

〔三〕會伐鄭 葬文公

〔四〕華元來聘

〔五〕薳如宋 會同盟蟲牢

〔六〕衛良夫侵

〔七〕會救鄭 同盟馬陵

〔八〕華元來聘

壽來納幣 九會同盟蒲 伯姬歸宋

行父如宋致女

〔十〕會伐鄭

〔十三〕會伐秦

〔十五〕會同盟戚 固卒 平公元

葬共公 華元出奔晉自晉歸宋 殺大夫山

魚石出奔楚

會會吳鍾離

〔十六〕鄭公子喜侵

華元會沙隨

〔十七〕會伐鄭 同盟柯陵 會伐鄭

〔十八〕楚鄭伐 魚石復入彭城 楚鄭侵

會同盟虛打

〔襄元〕會圍宋彭城

楚壬夫侵

〔二〕鄭伐 三國侵鄭

會戚 豹如宋

會戚遂城虎牢

〔三〕會同盟雞澤及袁僑盟

〔五〕會吳戚伐陳 會救陳 〔七〕會鄆

〔八〕會邢丘 〔九〕宋災 會伐鄭 同盟戲

〔十〕會會吳祖 楚鄭伐 會伐鄭 伐鄭虎牢

〔十一〕會伐鄭 同盟亳城北 楚鄭伐

會伐鄭 會蕭魚 〔十二〕楚貞侵

〔十四〕會會吳向 會伐秦 會戚

〔十五〕向戌來聘及向戌盟 劉 〔十六〕會漫梁大夫盟

會伐許

十八會同圍齊

十七伐陳 華臣出奔陳

二十會盟澶淵

宿如宋 三十一會商任

三十二會沙隨

三十四會夷儀

三十五會夷儀

同盟重丘 三十六會澶淵

殺世子痤

三十七九國會宋

大夫盟宋

三十九會城杞

三十宋災 伯姬卒

叔弓如宋葬共姬

會澶淵宋災故

昭元會晉楚號

四楚會申

六華合比奔衛

十成卒 元公元

十一叔弓如宋葬平公

會厥慙

十二華定來聘

十三會平丘同盟平丘

十八宋衛陳鄭災

十九伐邾

二十曹會自薳出奔宋

亥寧定出奔陳

二十一亥寧定自陳入南里叛

二十二亥寧定自南里出奔楚

二十五媯如宋

會黃父 佐卒于曲棘 景公元

二十六葬元公

二十七會扈

三十三會城成周

定元晉執仲幾于京師

四會召陵侵楚盟臯鼬

六晉執樂祁犁

十樂大心出奔曹

地出奔陳

弟辰暨佗疆出奔陳

十一辰佗疆地自陳入蕭叛

樂大心自曹入蕭

十四衛趙陽出奔

齊會洸 衛世子蒯聩出奔

弟辰自蕭來奔

十五鄭罕達伐

哀三樂祁伐曹

四執小邾子

五齊伐

七皇瑗侵鄭 圍曹

九皇瑗取鄭師雍丘

十伐鄭

十二會鄭 向巢伐鄭

序宋世紀曰宋先代之後也春秋書宋之事嘗多假借之文

若外災不書而宋獨書外異不記而宋獨記凡以異之也列

國會盟自陳以舜後而嘗後於蔡杞以夏餘而嘗不先於邾

二百四十二年之中獨宋常書公以列於諸侯之上其尊之

也亦至矣春秋之所以拳拳於宋者果何意哉以宋為聖人

之故歟則春秋非一家之史不宜獨私宋也以宋爵諸侯之

尊歟則川公郭公皆其稱公亦不宜獨予宋也然則謂其封

壤之大有加於列國歟則地僅比於魯衛民不亢於齊晉

其兵爭之少無得罪於諸侯歟則仇衛敵魯抗齊陵邾治滕

虐曹干戈之事殆無以異於他國意者其賢君之多能不替

其先代立國之意歟則廢居正之義啓爭國之謀基宋之禍

者穆也以除害而惡鄭以阻兵而黨衛成穆之亂者殤也扶

同惡以成稷之會志黷貨以啓鄭之戰踵殤之覆轍者莊也

納朝以抗王人之命黨齊以稔善鄰之仇履殤之危禍者閔

也會北杏以倡從齊之謀遇梁丘以固輔齊之好無役不會

無盟不從此桓公之所以僅稱賢也襄公圖伯不終其事淺

矣成公從伯之善不足以蓋從夷之非昭公去宗室之惡適

足以稔堅冰之釁文公因國人以有宋雖與晉三盟而猶不

忘從楚之好共公之從列國以盟楚雖與晉四會而猶不能

弭其駕宋之鋒平公不能強公室故魚氏始禍自彭城也元

公不能制其大夫故華向召亂由南里也景公不能室其私

寵故向魘啓豐入于備也反覆十三君之行事亦未有可稱而春秋所為拳拳於宋者豈無意乎蓋其故家遺俗流風善政考之春秋未盡亡也然僅有之善旋亦失之何則春秋之季不令之臣專祿周旋何國蔑有而一時諸侯猶曰惟宋事其君也先王之典廢存不存列國皆是而一時諸侯猶必曰於宋乎觀禮御說之賢稔於諸侯之間向戌之能卓為諸侯之選孔父之義子哀之清屹然衰世之俗皆有以取貴乎春秋則其人物之著見亦庶幾無忝於前哲之舊謂其風聲氣習泯無可稱固不可也然自司馬不能勝子弟之讒右師不能明君臣之訓人才之賢無復齒舊異時六禮之獻委於荆楚百牢之餼屈於強吳則典禮亦紊寧復故常甚至大心不輸王栗仲幾不受晉功則宋公之故為諸臣者盡忌之矣彼當時之諸侯猶類曰宋湯之後也曰宋周之客也吁宋之為

宋文獻之存者能幾何哉雖然春秋之所為拳拳於宋者必有意也嘗即商頌之那而考之蓋自微子至於戴公其間禮樂廢壞亦既久矣聖人刪詩收拾散亡之後而猶必存其頌聲於三百五篇之末果何說邪思昔成王建微子於上公以尹東夏而命之以書一則曰崇德象賢也二則曰率由舊章其崇先代之統重三恪之賓意如此其厚也宋之子孫能修其禮物以率先王之舊則成湯武丁之澤豈遽至於泯然而不繼歟一代文獻之美豈遽至於蕩然而無足觀歟先儒論聖人存商頌之意以為著三統之相承明王澤之相續是則春秋拳拳尊宋之意不然文獻不足夫子常嘆之矣於宋何取乎

春秋王霸列國世紀編卷第二

後學

成德

校訂

春秋王霸列國世紀編卷第三

一列國庶爵世紀 齊

齊太公之後也武王平天下封師尚父於營丘闔十二世釐公九年為魯隱公元年春秋終始齊十五公迄于簡公四年實魯哀公十四年後三世田氏代齊桓公伯事見齊伯桓紀莊十三年以前僖十八年以後事別為齊世紀云

隱元 僖公元

三盟石門

六盟艾

七弟年來聘

八盟瓦屋

意者齊人圖伯之始矣瓦屋周地人情於是乎始變矣

九會防

十會中丘

會伐宋 入郕

十一入許

桓二會稷成宋亂

三會羸

胥命蒲

鞏如齊逆女

送姜于謹

會謹

姜至自齊

弟年來聘

五如紀

十來戰郎

十一盟惡曹

十三公會紀鄭及齊宋衛燕戰四國敗績

十四祿父卒襄公元

宋以伐鄭

十五葬僖公會艾

十七會盟黃 戰奚

十八會齊樂公與姜如齊 公薨于齊公喪至自齊

莊元夫人孫齊 王姬歸

二王姬卒 姜會禚

三溺會伐衛

紀季以鄆入

四姜享祝丘 遇垂

葬紀伯姬 狩禚

五姜如齊師 會伐衛

六歸衛俘

七姜會防 姜會穀

八圍邾邾降

無知弒君諸兒桓公元

九殺無知

公及齊大夫盟蕲

公伐納子糾

小白入桓公元 葬襄公

戰乾時我師敗績

取子糾殺之

十敗長勺 次郎

滅譚譚子奔莒

十一王姬歸

自莊十三年至僖十七年事見齊伯桓紀

僖十八孝公元

宋伐 師救

戰贏敗績

狄救 葬桓公

十九會陳蔡楚鄭盟齊

二十齊狄盟邢

二十一宋齊楚盟鹿上

二十三伐宋圍緡

二十六侵我西鄙公追至鄆弗及 伐我北鄙 衛伐

公以楚伐取穀 至伐二十七昭卒昭公元 葬孝公

二十八戰城濮楚敗績

會盟踐土

遂如齊 會温

遂圍許

二十九會盟翟泉

三十狄侵

三十三國歸父來聘

狄侵

如齊 至齊

文元 敖如

四 逆婦姜于齊 狄侵

十一 狄侵

商人弒君舍懿公元

十五 歸敖喪 單伯至齊

遂及盟鄆丘

遂如齊

遂得臣如齊

宣元 遂如齊逆女

公會平州以定公位

三 赤狄侵

赤狄侵

高固來逆叔姬

七 公會伐萊

九 如齊 至齊 伐萊

歸我濟西田 元卒頃公

至齊 歸父如齊 葬惠公

國佐來聘

十三 伐莒

十五 蔑會高固無婁

成二 伐我北鄙 戰新築衛敗績

晉衛曹及戰鞏齊敗績 國佐如師

爰婁 取汶陽田 及楚盟蜀

五 會同盟蟲牢

八 晉韓穿言汶陽歸齊

會伐邾

二 遂如齊納幣

九 姜如齊 至齊 狄侵

十四 潘卒舍 敖卒于齊

單伯如 執單伯 執子叔姬

侵我西鄙 來歸子叔姬

十六 行父會陽穀弗及盟

十七 伐我西鄙 盟穀

十八 齊人弒君商人惠公元

姜氏歸齊 行父如齊

遂以婦姜至自齊 行父如齊

取濟西田為立公故 以賂齊也

四 公及齊平莒及邾

五 如齊 至齊

高固及子叔姬來

八 遂如至黃乃復

十 如齊 至齊

崔氏出奔衛 如齊

行父如齊 歸父如齊

十一 歸父會伐莒

十四 歸父會穀

十八 晉衛伐

行父許僑如嬰齊會

及國佐盟

同盟馬陵

七 會救鄭

會伐邾

九會同盟蒲 無野卒靈公元 葬頃公

十會伐鄭 來勝 十一僑如如

十三會伐秦 僑如以婦姜至自齊 十四僑如逆女

會會吳鍾離 十五會同盟戚

十六會沙隨 會伐鄭

十七會伐鄭 同盟柯陵 高無咎出奔莒 會伐鄭

十八殺大夫國佐 崔杼會同盟虛打

襄元會鄆 二崔杼會戚遂城虎牢

三會同盟雞澤及表僑盟 五會吳戚戎陳 會救陳

六滅萊 八會邢丘

九會伐鄭 同盟戲 十會會吳桓 會伐鄭

十一會伐鄭 同盟亳城北 會伐鄭 會蕭魚

十四會會吳向 會伐秦 衛侯出奔

十五劉夏逆王后 伐我北鄙圍成公救至遇

十六伐我北鄙 伐我北鄙圍成

十七伐我北鄙圍桃 高厚伐我北鄙圍防

十八伐我北鄙 會同圍 十九至伐 衛林父伐

環卒莊公元 殺大夫高厚

葬靈公 二十會盟澶淵 叔老如

二十一會商任 二十二會沙隨

二十三伐衛遂伐晉 襲莒 二十四鞫侵 崔杼伐莒

二十五崔杼伐我北鄙 崔杼弑君光景公元

二十七慶封來聘 二十八慶封來奔

二十九會城杞 高止出奔北燕

三十會澶淵宋災故

昭元會晉楚號 莒去疾自齊入莒

四楚執慶封殺之

六伐北燕

七暨齊平 媯如齊蒞盟九翟如

十欒施來奔 十一會厥慙

十二高偃納北燕伯于陽 慙奔齊

十三會平丘同盟平丘 十六伐徐

十九高發伐莒 二十二伐莒

二十五公孫齊次陽州 言公野井 取鄆

二十六公至齊居鄆 公會齊盟鄆陵

二十七公如齊至齊居鄆 公如齊至齊居鄆

二十九高張來唁公 三十一會城成周

定四會召陵侵楚盟臯鼬 七盟鹹 執結侵衛盟沙

國夏伐我西鄙 八公侵 至侵 公侵

至侵 國夏伐我西鄙 九齊衛次五氏

十及齊平 會夾谷 至夾谷 來歸鄆 謹龜陰田

會安甫 叔仇如齊 十二會盟黃

十三齊衛次垂葭 十四會牽 會洮

十五齊衛次渠蔭

哀元齊衛伐晉 三齊衛圍戚

五伐宋 杵臼卒 安儒子荼 叔還如 葬景公

六國夏高張來奔 陽生入齊 陳乞弒君荼 悼公元

八取謹及闡 歸謹及闡 十公會吳伐 陽生卒 簡公

趙鞅侵 至伐 葬悼公 公孟彊自齊歸衛

十一齊國書伐我 公會吳伐 國書及吳戰艾陵齊

敗績獲國書

序齊世紀曰齊大師之後受地于王方百里者五東方之國莫大焉桓公之事已詳伯紀矣前乎桓公則僖公有與伯之

志而未成後乎桓公則景公有嗣伯之圖而不遂僖公之初已號東州之小伯未有參盟者而僖公參盟于瓦屋未有晉命者而僖公晉命于蒲諸侯稍稍崇向之矣桓公之九合是亦庶僖公積累之勢而強於為善規模之成非僖公前日比也桓公之業雖墮於孝公而齊之為國終春秋之世常為諸侯之雄靈公以來怙其強大頗為夏盟之梗雖以晉悼盛時會同之間皆以大夫世子而齊君不出駸駸逼晉之漸景公繼之嗣伯之圖迄於無成反基削弱何哉嘗以齊事顛末攷之景公親踵莊公之難堅冰已形玩忽不戒失於改物襲其厲階授政強家卒之姜弱媯昌國遂隨之然亦非一朝一夕之故矣春秋端本澄源之法固不專咎末流也使齊之政權不下移則國豈易量哉鹿門之敗姦宄相尋高唐之請封殖益厚至於南郭之謀迄遂始禍舒州之事常繼稔亂齊欲不為陳氏不可得也是齊國之微實生於大夫之專然使人心未移則雖授陳氏以柄其敢居哉而齊自叔季以來山澤之利盡歸於國偪介之關暴征於民於是陳氏始得以私售其濡沫之惠公族之無邑者盡反之貧約之無粟者盡予之陳氏欲無得民亦不可得矣是大夫之專實生於人心之去然使齊之禮義素明雖陳氏子孫日以厚利誘民民之心豈易搖哉而齊之家法並妻匹嫡已無以示詒世之訓反坫塞門已有以開僭上之源惠頃之世私家已強崔慶之亂不能正之於先藥高之亂不能正之於後是以景公象之內嬖孽子以啓嫡庶之爭外助強家以紊君臣之義為齊之民不復知是非逆順之理尊卑之分欲其不歌舞於陳氏之施亦不可得矣是人心之去又生於禮義之不明雖然禮義由賢者出使齊君世得賢者而用之必能為國以禮明民以義豈至陷

溺之深而為非禮不義之舉哉而齊自頃惠以來任用益舛靈公之政移於夙沙衛莊公之權委於賈舉州綽循至景悼二公之時慶封方去高止復專獨一晏子之賢周旋於陳鮑藥高之間逆知陳氏之患而不得去雖正言於燕間之頃竊嘆於食享之私力不能為則終為納政與邑不出而已然則欲禮義著明而人心不失其正不可得矣是以禮義之不明又生於仁賢之見弃反覆至是亡齊者豈必陳氏哉齊之為國亦足以自亡矣

〔二〕列國庶爵世紀 許

許太岳之嗣也而封於周入春秋十有一年莊公迫於鄭而奔衛又十有五年而穆公復入國六傳復滅於鄭許祀猶未殄也元公卒之明年實獲麟之歲

〔隱元〕

〔十一〕鄭入許 禮公奔衛

〔桓元〕鄭以璧假許田

〔十五〕許叔入許

〔莊十六〕會同盟幽

〔二十九〕鄭侵許

〔僖四〕會侵蔡伐楚

新臣卒 僖公元年 葬穆公

會侵陳

〔五〕會首止 盟首止

〔六〕楚圍諸侯遂救

〔八〕會盟洮

〔九〕會葵丘盟葵丘

〔十〕齊許伐北戎

〔十三〕會鹹

〔十四〕城緣陵

〔十五〕會盟牡丘次匡救徐

〔十六〕會淮

〔二十一〕會孟

〔二十二〕宋衛許滕伐鄭

〔二十七〕楚陳蔡鄭許圍宋

〔二十八〕諸侯遂圍許曹會圍

〔二十九〕至圍許

〔三十三〕晉陳鄭伐許

〔文五〕業卒 昭公元年

〔六〕葬僖公

〔九〕救鄭

〔十四〕會同盟新城

宣十七錫我卒靈公元葬昭公

成三鄭去疾伐許。鄭伐許。四鄭伯伐許。

九鄭人圍許。十四鄭喜伐許。

十五遷葉

襄二晉荀偃伐許。十六叔老會四國伐許。

三十四楚蔡陳許伐鄭。三十六甯卒于楚悼公葬靈公

三十七會宋。大夫盟宋。三十鄭良霄出奔許自許入鄭

昭元會晉楚虢。四楚會申。伐吳

九遷夷。十八遷白羽

十九世子止弑君買。葬悼公

三十三吳敗雞父

定四會召陵侵楚盟臯鼫。遷容城

六鄭游速滅許以斯歸

哀元圍蔡。十三成卒。葬元公

序許世紀曰許在春秋不得為微國也春秋書許之事甚略焉二百四十二年間許男之卒葬纔七見於經大夫之名氏曾不一著于冊凡記許之事自非從齊晉宋楚之役則蒙晉楚齊鄭之兵其他特書者蓋無幾也春秋之所為甚略於許何哉春秋列國久於從夷者莫許若也蓋自齊桓會淮之後一於向楚凡百六十年之間與晉者纔一二役夷攻其事許之為國始終實偏於鄭齊伯未衰許常從齊晉伯方競許常貳晉然當其從齊也楚常不得以急許而許猶以無恐於鄭及其貳晉也晉雖或無力以得許而許未嘗帖然以從楚是何邪且許之始亡也曰齊侯鄭伯入于許許之終亡也曰鄭游速滅許是許之始終見偏於鄭可知也然自鄭莊入許而不有其地分許而不廢其祀信有大造於許矣未幾爭鄭之

事起於忽突而定許之計成於齊魯許叔遂因以入許且鄭之日有事於許也而自齊桓既伯許七從於會盟三從於侵伐雖面縛銜璧之謀忍決於楚人圍許之餘而衣裳兵車之會卒不替於諸侯救許之後鄭人僅能一致淺事之侵蓋未病也豈其許方秉義於從齊鄭亦不得有辭於討許歟齊伯既微宋事亦淺伐鄭會孟且服且貳不必論矣晉以文襄之盛猶莫能致許於會盟自時厥後伐鄭圍蔡惟曰從楚伐吳滅賴惟曰從楚陽橋之師為大夫右孟諸之至為諸侯先凡楚人有所事於中華惟許是攝是贊宜許之可以固事於楚而無虞於他國也然自晉文嘗圍以諸侯襄公繼伐以三國悼有知罃之伐平有荀偃之侵猶曰伯討以區區之鄭而伐以去疾又伐以子喜既伐之又圍之使楚人一遷于葉再遷于夷又遷于白羽又遷于容城雖為之訟于楚請于楚至於其君不反于楚而鄭不亡許不止也是何仇許之深邪豈非存夏從夷非所以即安而以外謀內雖楚亦未易以逞欲歟反覆許之顛末則其從齊也可以無恐於鄭背晉也而不得以久安於楚亦甚明矣嗚呼許太岳之祀周之封國也使許不忘鄭之大德毋荒弃先王設侯建屏之義以輔翼伯主獎華黜夷之績則許雖無與立必有與斃何惡於鄭何畏於楚哉而反是也宜春秋之甚略之也

三列國庶爵世紀 莒

莒亦列國也恃陋用夷以見略乎春秋世系本末不可詳攷姑序其事為莒世紀

隱二入向 盟密

四伐杞取牟婁

八盟浮來

桓十二會盟曲池

莊十譚子奔莒

十九姜氏如

二十姜氏如

二十七莒慶來逆叔姬

閔二慶父出奔莒

僖元友敗莒酈獲拏

三十五盟洮

二十六盟向

二十八盟踐土會溫圍許

文七徐伐。敖如莒莒盟

八敖奔莒

十八莒弒君庶其

宣四公及齊平莒及邾莒不肯公伐莒取向

十一歸父會齊伐

成七會救鄭 同盟馬陵

八嬰齊如莒

九會同盟蒲

楚嬰齊伐潰入鄆

十四朱卒

十七齊高無咎奔莒

襄元會圍宋彭城

三會同盟雞澤及袁僑盟

五會吳戚

六滅鄆

八伐我東鄙

九會伐鄭 同盟戲

十會會吳桓 伐我東鄙

會伐鄭

十一會伐鄭 同盟亳城北 會伐鄭會蕭魚

十二伐我東鄙圍台 會伐秦

侵我東鄙 會戚 十六會淇梁 大夫盟

晉執莒子邾子以歸 十八會同圍齊

十九盟祝柯 二十會盟向 會盟澶淵

二十一會商任 二十三會沙隨

二十三齊襲 二十四齊崔杼伐 會夷儀

二十五會夷儀 同盟重丘 二十九會城杞

三十會澶淵宋災故 三十一莒人弒君密州

昭元取郟 去疾自齊入莒 展輿出奔吳

五 牟夷以牟婁及防茲來奔 叔弓敗莒于蚡泉

十 意如叔弓獲伎 十三 會平丘 同盟平丘

十四 去疾卒 殺意恢 十九 齊高發伐

二十三 庚輿來奔 二十六 會盟鄆陵

三十二 會城成周

定四 會召陵侵楚 盟臯鼬

序莒世紀曰春秋二百四十二年之經書莒子者五書莒大夫者四莒之始末不詳於經何邪原莒亦列國也春秋曷為略之夷之也曷為夷之居夏用夷故夷之也且莒之為國偏於齊為甚雖嘗與魯事晉亦皆視齊以為輕重蓋齊國於琅邪莒國於城陽觀齊疆有所謂莒疆之社有所謂莒旁之邑則封壤相錯可知也攷之經齊之襲莒者一伐莒者二密州之變去疾以齊入展輿以齊出意恢之亂郊公以齊出庚輿

以齊入異時廢置之權宋不得以行於鄭魯不得以行於邾齊獨得而擅之莒莒為齊弱久矣乃若魯最鄰於莒者也入于春秋莒嘗有接魯之文密之盟浮來之盟曲池之會洮向之會是莒魯之為好也鄆之敗蚡泉之敗向邾之敗牟婁防茲之取是莒魯之為爭也然歸父伐莒則齊魯親也嬰齊如莒則齊魯仇也魯襄恃晉莒滅鄆杞齊頃服晉魯修向盟則莒之於魯一離一合未嘗不以齊故晉最強而遠於莒者也前乎文襄莒雖未有從晉之事自文之伯與會者二至景之伯與會者亦二悼平之伯與會者二十昭定之伯與會者各一然馬陵同盟則齊服晉也祝柯同盟亦齊服晉也齊逃淩梁莒為晉執齊圍挑防魯蒙莒伐則莒之於晉一從一違亦未嘗不以齊故夫晉太而遠於莒魯近而弱於晉獨齊鄰於莒而其強百倍焉故其畏齊特甚亦其勢然也其他或見伐

於徐見入於楚與杞有爭與邾有怨與鄆有惡往往視其強弱以為勝負大抵當春秋之時為弱小之國進退去就從於強今夫眾暴寡大陵小狃於常習皆無足怪而莒之所以為夷者正不在是也秦之為狄始於戰殺鄭之為狄始於伐許莒之為夷必有其故矣莒之弊政見於經者甚寡然嘗攷之春秋之始未有書入人之國者入國之事自莒始未有書外專盟之事者專盟之事亦自莒始未有書諸侯相伐取地者相伐取地之事亦自莒始以蕞爾之莒恃其強暴稔尋常之爭逞尺寸之憾皆王法所必誅者也春秋託始於魯隱數簡之中累書莒人而不殺莒之為夷其昉於是乎終春秋之世國君鮮有不稱諡者莒獨不稱諡大夫鮮有不書名氏者莒獨不書名氏國君無書朝大夫無書聘者是其國無君臣之禮無上下之節無名號貴賤之等無文物施報之容其君凡

五見經而斃於亂者二奔於亂者二大夫凡五身經而奔於亂者二誅於亂者一是又其君臣上下之際皆無復分義之相保其有不胥而為夷哉春秋之夷之也宜也或曰莒以僻陋在夷故春秋略之嗚呼春秋書荆人錄吳子不輕絕於夷狄如此使莒居夷而用夏春秋庸得而略之乎

〔四〕列國庶爵世紀 薛

薛奚仲之後也仲虺相湯世食于薛至周受封實先宗盟當春秋之世薛雖甚微然先代封爵之餘也不可以不志

〔隱十一〕來朝

〔莊三十〕薛伯卒

〔成二〕楚盟蜀

〔襄元〕會圍宋彭城

〔五〕會吳戚

〔二〕會戚遂城虎牢

〔九〕會伐鄭 同盟戲

十會會吳祖

會伐鄭戍鄭虎牢

十一會伐鄭

同盟亳城北

會伐鄭會蕭魚

十四會會吳向 會伐秦

十六會會溟梁大夫盟

十八會同圍齊 盟祝柯

二十會盟澶淵

二十二會沙隨

二十四會夷儀

二十五會夷儀

二十九會城杞

三十會澶淵宋災故

昭十三會平丘 同盟平丘

三十五會黃父

三十一薛伯穀卒葬獻公

三十二會城成周

定四會召陵侵楚盟臯鼬

十二薛伯定卒葬襄公

十三薛弒君比

哀四薛伯夷卒葬惠公

序薛世紀曰昔先王之制國大者百里小者不能五十為之

建屬長連帥牧正州伯焉雖班爵不同而考禮正刑修德以尊天子其責一也薛諸任之國自奚仲為夏車正而遷于邳仲虺為湯左相而居于薛蓋先代封爵之餘也春秋之初嘗稱侯以朝魯春秋之中嘗稱伯以會晉其不得為微國明矣然來魯之後凡百二十二年薛君大夫名氏無見於經自盟蜀之後又百一十年間非從晉於盟會而薛事之見於經者纔一二耳豈非其國寡弱不足以自通於諸侯歟蓋嘗攷之自齊桓主盟諸侯官受方物晉氏世伯列國聽從自以受朝聘之數於是政令不常貢賦無藝迄于春秋之終不惟小侯弱邦率以為病而大國亦不勝其困矣故魯人會戚求屬鄆也齊人盟宋求屬邾也至於成周之會宋遂傲然欲以二一小國為役而絕薛於周呀先王建國同為蕃屏王室而宋之為役尚何以為諸侯乎不特此爾觀晉悼始會薛實不來曰以

齊故及崔子既來薛大夫亦會則又以為齊故異時宋嘗從楚又以薛適楚則又不能不為楚令是聽也以蕞爾之薛嘗役於宋矣又偏之以齊臨之以晉楚若何而能國哉吾觀薛宰之言株連反覆首舉踐土之載書以為言而仲幾亦曰踐土固然攷之踐土之盟薛不在諸侯意者文公雖復諸侯之職而不必盡勤小國於會是時晉之從政者新亦卒莫道文襄之故以復薛之舊吁先王制諸侯建方伯之意微矣崇明祀保小寡之義隱矣惜哉

五列國庶爵世紀 邾

邾曹姓之國也春秋以來微亦甚矣然介乎數大國之間與春秋始終迄于戰國之季而未亡不可不攷

隱元及邾儀父盟薹 五邾鄭伐宋

七公伐邾

桓八伐邾

十七會邾儀父盟趙

莊十三會北杏

二十八瑣卒

閔二姜氏孫于邾

僖元會榿 公敗邾師于偃 十八宋曹衛邾伐齊

十九宋曹邾盟曹南 鄆子會盟邾 邾執鄆子用之

二十一公伐邾

戰升陘

三十三公伐邾取訾婁

文七公伐邾取須句

十四伐我南鄙 叔彭生伐邾 晉納捷菑弗克

宣元來朝

十歸父伐邾取繹

十三蘧蔭卒

遂伐邾

十七會同盟斷道

十八戕郕子于郕

成二楚盟蜀

五會同盟蟲牢

六來朝

七會救鄭 同盟馬陵

八會伐鄭

十三會伐秦

十五會同盟戚

會會吳鍾離

十六會沙隨 會伐鄭

十七會伐鄭 同盟柯陵

會伐鄭

十八來朝 會同盟虛打

襄元會圍宋彭城

會次郕 二會戚遂城虎牢

三會同盟雞澤及表僑盟

五會戚

六豹如邾

七會郕

八會邢丘

九會伐鄭 同盟戲

十會會吳祖

會伐鄭戕鄭虎牢

十一會伐鄭同盟直毛城北

會伐鄭會蕭魚

十四會會吳向 會伐秦

會戚

十五伐我南鄙

十六會溴梁 大夫盟

晉執莒子邾子以歸

十七掎卒 伐我南鄙

十八會同圍齊

十九盟祝柯晉執邾子

取邾田自漸水

二十會盟澶淵 速伐邾

二十一庶其以漆閭丘來奔

會商任

二十二會沙隨

二十畀我來奔 紇出奔邾

二十四會夷儀

二十五會夷儀 同盟重丘

二十八來朝

三十會澶淵宋災故

昭元董卒 葬悼公

十一獲會侵祥

十三會平丘 同盟平丘

十八入郕

十九宋伐

二十五會黃父

二十六會盟鄆陵

二十七會扈 快來奔

三十一黑肱以濫來奔

〔定三〕穿卒 葬莊公

何忌及盟拔

〔四〕會召陵侵楚盟臯鼬

〔十四〕來會公

〔十五〕來朝 來奔喪

〔哀元〕何忌伐

〔二〕斯州仇何忌伐取潞東田

沂西田

州仇何忌及盟句繹

〔三〕州仇何忌圍

〔六〕何忌伐

〔七〕公伐入邾以邾子益來

〔八〕歸益于邾

〔十〕益來奔

序邾世紀曰邾其猶有聖賢之澤歟春秋之初克之未命猶以字稱克之既卒始以子錄其得齒於列國最後也鄆子見戕須句蒙取而威虐是肆庶其竊邑黑肱專地而姦宄內訌會盟屬齊厚斂私吳君為晉俘國習衛討宋壘在郊魯兵狎

鄙而強大外陵藐然之邾亦幾於無足稱者然君子所為猶有取於邾者豈謂是哉嘗考之經二百餘年小國之睦於交鄰謹於事伯最為有常者莫邾若也其君臣之賢多足稱紀而守義秉禮之風類非當時大國之所及吁亦有所自來矣且魯自桓公之世邾稱人以朝者一宣公以來邾稱子以朝者一會公者一奔喪者一自其他近魯之小國雖時好魯之事蓋未能如邾之有常者非交鄰之睦歟齊桓之伯首從非杏之會宋襄之伯亦與曹南之盟晉文之伯亟聽于温之役定公之會晉者十一宣公之會晉者十七悼公之會晉者七莊公之會晉者一自其他畏晉之小國雖鮮有不從晉之事蓋未能如邾之有常者非事伯之謹歟儀父盟薳之舉首親賢以修好蘧蔣遷繹之謀不憚忘身以利民皆卓為賢君求之當時諸侯往往佳兵以殘民信鮮儷矣叔術遜國之仁足

及其子孫茅夷鴻愛國之義足以存其宗社皆儼為賢臣
 求之當時列國大夫莫非徇利以背君亦可謂絕無而僅有
 矣孰謂區區之邾莒焉若不足以自存而君臣上下之間顧
 有是邪異時捷菑介晉以求主卻克以八百乘之眾至于城
 下邾人以一辭卻之蓋昔者宋之得施於鄭戎之得施於曹
 者晉曾不得以行之於邾也楚靈合諸侯于申汰心虐燄震
 搖中華宋鄭大侯奔走恐後邾人亦獨晏然恃魯以不會蓋
 昔者楚成共所能令於蔡鄭吳夫差所能令於魯衛者靈王
 獨不能以加之於邾也吁葦爾之邾果何以得此於晉楚耶
 庶幾守義秉禮之風亦略可觀矣吁魯之擊柝聞於邾其殆
 密邇洙泗之地濡染儒書之習有聞周公之教而興起者乎
 蓋至穆公之時邾與魯閔民不死難而仁政之言親上死長
 之訓猶得聞於先生大儒之口則邾之為國猶未至於空虛
 也不然以微國而介於齊晉宋魯之間何啻鹿豕在於餒虜
 之側抑何以壽其國至於久而不傾哉

六列國庶爵世紀 小邾

小邾微乎微者也嘗以名書乎經矣受附庸之封齒列國之
 後能傳於久故亦為之紀云

莊五 邾黎來來朝

十五 宋齊邾伐邾

僖七 小邾子來朝

杜云邾黎來朝仍王命而
來邾之別封故曰小邾

襄二 會戚遂城虎牢

七 來朝

九 會伐鄭 同盟戲

十 會會吳祖

會伐鄭 鄭虎牢

十一 會伐鄭 同盟亳城北

會伐鄭 會蕭魚

十四 會會吳向 會伐秦

十六 會湨梁 大夫盟

十八 會同圍齊

十九 盟祝柯

二十 會盟澶淵

會沙隨

三十四會夷儀

日夷儀

同盟重丘

二十九會城杞

三十一

澶淵宋災故

昭三小邾子來朝

四楚會申

十三會平丘

同盟平丘

十七來朝

三十五會黃父

三十一會城成周

定四會召陵侵楚盟臯鼬

哀四宋執小邾子

序小邾世紀曰小邾亦曹姓之國介於海濱畏齊事魯而偏於宋非一日也觀晉悼之世小邾子不至於會悼公欲討之其大夫曰是齊故也晉襄之世小邾嘗至於朝襄公欲卑之其大夫曰是實不忘魯好也非其畏齊事魯者然歟魯莊十五年經書伐邾者宋人哀四年經書執小邾者亦宋人又非

其偏於宋者然歟夫以弱國小衆剪然求存於強齊宋魯之間常恐不合亦無足道明矣然攷之經杞朝而不稱侯以其不共於朝也介來而不謂朝以其不能於朝也以至滕薛邾莒之爵皆以成國而駸駸焉且趨於僻陋之域而不自知春秋或自侯而書伯書子或自子而書人書名其不能國亦可知矣獨小邾自黎來之來其國稱邾則非成國也其君稱名則未成乎君也其朝稱來則不成乎朝也豈不甚微矣乎而黎來之後遂能以禮通於侯國卒從齊桓以尊周室而受附庸之封魯僖以後朝魯者四晉悼以後會晉者二十執玉端委而周旋於強侯大邦之間從事於禮樂文物之盛是可嘉也已故嘗觀昭公十七年小邾子來朝於其燕也有菁莪之賦叔孫昭子曰不有以國其能久乎嗚呼藐然之邾偏而不傾與春秋終始焉是豈無所自來哉

〔七〕列國庶爵世紀 鄆
鄆事至無足言矣見於經者纔數端聖人錄之所以示亡國之鑒可不謹歟

〔僖十四〕季姬及鄆子遇防使鄆子來朝

〔十五〕季姬歸鄆 〔十六〕鄆季姬卒

〔十九〕會盟于邾邾執用之

〔宣十八〕邾人戕鄆子于鄆

〔成二〕楚盟蜀

〔襄元〕次鄆

會吳戚

〔五〕豹鄆巫如晉 〔六〕莒人滅鄆

序鄆世紀曰鄆之為國微乎微者也事之見乎經者無幾矣一朝于魯一會于宋其君見用於邾而終戕於邾其國見偏於莒而卒滅於莒孱弱如是是尚得為國乎雖然國無小不可易也禮義苟明偏而不傾鄆之滅亡誰之咎哉蓋滅人者罪易見滅於人者罪難知使鄆能強於為善以保其國亦何孱弱之有今考之經鄆之亡其大罪有二而他不與焉三綱五常建於天地豈非保身立國之大本歟縱情虧禮者殺身之符券徇愛弃義者亡國之斧斤斷斷乎不可誣矣先儒謂鄆子之用於邾戕於邾不在於曹南之後宋與其臣子之不能捍患也遇防來朝啓怨再世而鄆子已亡矣鄆之偏於莒而滅於莒不在乎會戚之屬魯與其鄰國之不救患也如晉觀巫立所出以為後而鄆國已滅矣嗚呼身有既亡國有既滅而不自知者其鄆之謂乎春秋本其遇防之禍而直書之曰戕備其觀巫之跡而顯書之曰滅其垂戒之意遠矣以此坊民後世猶有玩尤物以喪其身保異姓以墜其國者吁

〔八〕列國庶爵世紀 紀

紀事前乎春秋無聞焉亦齊之宗也而偏於齊季入齊矣季
姬歸鄆矣春秋猶書紀焉是存紀也紀而序之是亦春秋之
意歟

〔隱二〕裂繻來逆女

伯姬歸于紀 紀莒盟密

〔七〕叔姬歸紀

〔桓五〕齊鄭如紀

〔六〕公會紀于成 來朝

〔八〕祭公來遂逆王后于紀 〔九〕紀季姜歸京師

〔十三〕公會紀鄭及齊宋衛燕戰四國敗績

〔十七〕公會齊紀盟黃

〔莊元〕齊遷紀邾鄆郟

〔三〕紀季以鄆入齊

〔四〕紀伯姬卒 紀侯大去其國 齊葬紀伯姬

〔十二〕紀叔姬歸于鄆

序紀世紀曰紀為齊弱久矣亡紀者齊歟紀歟昔者大王居

邠嘗偏於狄矣縣之詩曰肆不殄厥愠亦不殞厥問柞械抄
矣行道允矣昆夷駮矣夫自其迺慰迺止迺疆迺理以至於
高門有仇冢土既立軍國之容無一不備然後可以不絕其
所愠之夷亦不廢其聘問之禮以須昆吾之駮蓋寒暑之節
龍蛇之蟄未有不積而能施不屈而能信者此大王所以去
邠而基王業歟紀齊同姓也而齊欲滅之此豈一朝一夕之
積哉紀之自為國者宜如何也入春秋世三年而紀侯去國
紀之舛政不詳於經試即其一二事而考之尚有可論者蓋
裂繻逆女秋結魯援子伯盟當冬與莒好齊鄭合謀而與魯
會成鄰好是託魯公解體而季姜歸周正寵是求曾是以為
謀難之道歟以至齊怒未怠遽挾鄭與魯以戰齊齊雖敗而
怨愈深豈證辭之義敗齊未已又借魯致齊以盟黃齊雖盟
而禍愈亟亦豈釋怨之方夫知畏齊而謀國若是尚謂國有

人乎三邑既遷而紀季入齊紀侯去國勢宜然也吁本支同出封壤相鄰蓄憾九世造釁十年而紀終無以謀其不免也非特齊能亡紀紀之為國亦足以自亡矣故曰梁亡自亡也鄭奔其師自奔也紀侯大去其國自去也其與大王去邠之事遠矣然則齊侯無罪乎齊紀同姓而謀紀之國無所不至其罪不待貶絕而自見也乃若春秋之法叛人書奔而紀季入齊不書奔則非叛人竊地稱名而紀季以鄆不稱名則非竊地經書紀季以鄆入于齊是紀祀猶有奉也異時書紀叔姬歸于鄆是紀侯之室家猶有歸也以春秋攷之季則未有罪爾

九列國庶爵世紀 微國

傳曰任宿須句顓臾風姓也實司大皞與百濟之祀以服事諸夏小國之祀其先皆有奉之者矣春秋之世存者蓋寡即其見於經者而錄之亦古人存周禮而脩祀之意歟

隱元盟宿

八宿男卒

莊十宋人遷宿

隱二莒人入向無駭入極

十宋蔡衛伐戴鄭伐取之

桓二蔡鄭會鄆

鄆侯吾離來朝

五州公如曾

六寔來不復其國

七穀伯綏來朝

十五邾人牟人葛人來朝

僖五公孫茲如牟

莊十五齊師滅譚譚子奔莒

莊十三齊人滅遂

十七齊殲于遂

二十三蕭叔朝公

僖三十三介人侵蕭

宣十二楚子滅蕭

莊二十四郭公

三十齊人降郭

閔二齊人遷陽

僖十狄滅温温子奔衛

十七滅項

十九梁亡

二十三公伐邾取須句

魯之封國屬國

文七公伐邾取須句

宣四公及齊平莒及邾

十六邾伯姬來歸

成七吳伐邾

八僑如會伐邾

襄七邾子來朝

宣七公會齊伐萊

九齊侯伐萊

襄六齊侯滅萊

成六取鄆

襄十遂滅偃陽

姒姓

十二取鄆

昭十八邾人襲鄆

凡二十五國

序庶爵微國紀曰秦穆有言德之不建民之無援昔文武之

有天下也選建親賢大國數十亦既足以統屬人心縣固國勢矣其人非周之子孫其地不足以爲周之屏翰先王皆爵而列之此其公天下之心豈特以私王室哉存先代之後表仁賢之人皆所謂建德以爲民援非惟不可廢亦有所不敢廢也春秋諸侯不復知崇明祀保小寡之義弱強相併而爲盟主者亦不復能與其疆場之事故自隱桓以來魯入極矣鄭取戴矣鄧畏楚衆齊迫陽遷向蒙莒師邾踐鄆境終春秋之世微國困於兵革寇攘之禍殆不勝數而得周旋於幣玉牲歆以從諸侯之後者其無幾焉耳吁亦足以見周禮之衰矣德之不建民之無援是以生民不復見德于戈之禍極於戰國而後已悲夫木之茂也羣動息焉水之涸也雖蛙鼃不能以自存方春秋之中世魯雖無腆猶存須句見王澤之未殄也至其末也顛更在邦域之中猶且不免見王澤之竭也

君子於此亦可以考論世變云

十夷狄世紀 楚

楚之先熊繹始封於荊閔世十三至武十九年為魯隱公元年春秋始終楚十三君迄于惠之八年實魯哀之十四年又十有三歲而滅於秦

隱元

楚武王十九年按史記熊通立三十五年伐隨隨人為之請周尊楚王室不聽熊通怒而自立為武王

莊四

文王元

十荊敗蔡莘以獻舞歸

十二荊入蔡

十六荊伐鄭

十七 楚敖元

二十一 成元

二十三荊人來聘

二十八荊伐鄭

僖元楚人伐鄭

二楚人侵鄭

三楚人伐鄭

四遂伐楚次陘楚屈完來盟

盟召陵至伐楚

五滅弦

六圍許

十一伐黃

十二滅黃

十五伐徐 敗徐婁林

十九盟齊

二十伐隨

三十一盟鹿上

會孟執宋公以伐宋 宜申來獻捷

會盟薄釋宋公

三十二戰泓宋敗績

三十三伐陳

二十五圍陳納頓子于頓

三十六遂乞師

滅夔以夔子歸 伐宋圍緡

公以楚師伐齊取穀

二十七圍宋 公會諸侯盟宋

二十八救衛戰城濮敗績

殺大夫得臣

衛侯出奔楚

衛侯鄭自楚復歸衛

文元世子商臣弒君顓

穆王立

三圍江晉處父伐楚救江

四滅江

五滅六

九伐鄭 椒來聘

十殺大夫宜申 次厥貉

十一 伐麋

十三 莊王立

宣元 侵陳遂侵宋

楚自有周道吾鄧魯陽關過魚齒汝水度成澤以伐陸渾之戎遂觀兵周疆視之若無人矣

侵鄭

四 伐鄭

五 伐鄭

八 滅舒蓼

九 伐鄭

十 伐鄭

十一 楚陳鄭盟辰陵

殺陳夏舒

入陳納寧行父于陳

十二 圍鄭

戰邲晉敗績

自入陳勝邲楚莊一向遂驕伯業之終業豈不由此哉

滅蕭 蕭是楚附庸豈足以當楚師今久圍不退明年申舟聘齊人令無假道于宋是欲激宋而起兵端也莊王之心至此

十三 伐宋

十四 圍宋

十五 歸父會楚于宋

宋及楚平

十八 旅卒 春秋以前未嘗書君之卒今於楚莊特書之吁春秋雖欲不書安得而不書

共王立

成二 楚鄭侵衛

公會嬰齊于蜀

十二 國盟蜀

六 嬰齊伐鄭

七 嬰齊伐鄭

吳入州來 楚始羅於奔命

九 嬰齊伐莒莒潰入鄆

十五 伐鄭 宋魚石出奔楚

十六 戰鄆陵楚鄭敗績

殺大夫側

十七 滅舒庸

十八 楚鄭伐宋

傳伐彭城納魚石

楚鄭侵宋

襄元 壬夫侵宋

殺大夫申 三 嬰齊伐吳

五 殺大夫壬夫

貞伐陳 七 貞圍陳

八 貞伐鄭

十 楚鄭伐宋

貞救鄭

十一 楚鄭伐宋

執鄭良霄 十二 貞侵宋

十三 審卒 康王立

十四 伐吳

十八 午伐鄭

二十 蔡履出奔陳弟黃出奔

二十一 晉欒盈出奔

二十二 殺大夫追舒

三十三黃自楚歸陳

三十四伐吳 楚蔡陳許伐鄭

三十五屈建滅舒鳩

吳遏伐楚門巢卒

三十六許男甯卒于楚

楚蔡陳伐鄭

三十七會晉楚于宋盟于宋

昭卒 鄭敖卒

三十九公在楚 至楚

三十遠罷來聘

昭元會晉楚號 麋卒

比出奔晉 靈王立

四十三國會申執徐子

八國伐吳 執齊慶封殺之

遂滅賴

五殺大夫屈申 八國伐吳

六遠罷伐吳 叔弓如楚

至楚

八執陳于徵師殺之

滅陳執招放于越殺孔奭

九叔弓會楚于陳

十一虔誘蔡般殺于申

弃疾圍蔡

滅蔡執世子有歸用之

十二殺大夫成熊

伐徐十三比自晉歸楚弑君虔于

乾谿

弃疾弑比 平王立

十六誘戎蠻子殺之

十七及吳戰長岸

二十一蔡朱出奔楚

二十二宋亥寧定自宋南里出奔

二十三蔡東國卒于楚

二十殺大夫郤宛

三十徐子章羽奔楚

定二伐吳

四十八國會召陵侵楚

圍蔡蔡以吳及楚戰柏舉楚敗績

囊瓦出奔鄭

吳入郢

十四三國滅頓以頓子牂歸

十五滅胡以胡子豹歸

哀元楚陳隨許圍蔡

四晉人執戎蠻子歸于楚

六卒

九伐陳

十結伐陳

十三申伐陳

序楚世紀曰楚為夷狄前乎春秋已慮之矣詩云 彼荆楚

是也然春秋書夷狄之法未有嚴於楚者始曰荆繼曰楚始曰人繼曰子何其進之漸而與之不亟邪春秋之世夷狄為中國患者曰秦楚吳越或狄戎盛於春秋之始狄微於春秋之中吳始大於春秋之季秦直為晉仇越僅與吳抗其患皆未有若楚之暴且久者是故春秋書楚之法特嚴歟然自天下大勢言之則楚之患其初止於猾夏其後至於抗衡又其後遂至於用中夏之柄由楚一國之勢言之則共莊以前雖僻在荆蠻而其國實趨於強康靈以後雖屢抗中華而其國實趨於弱究一經之始末而楚之盛衰槩可考也蓋楚有方城以為城漢水以為池有申呂之田以禦平外有申息之門以備於內有成莊共平康昭之為君有子文孫叔子庚子木子蕩之徒為之謀 國此其所以能世抗齊晉而與春秋始終歟 觀楚十三君其與齊晉爭者非一國戎之世所爭者

蔡鄭陳宋曹衛而大者則召陵之盟泓與城濮之戰也穆莊之世所爭者獨不及曹衛而大者則辰陵之盟邲之戰也共之世所爭者又獨不及蔡而大者則蜀之盟鄆陵之戰蕭魚之會也至康盡得諸侯而遂有宋之盟至靈幾伯諸侯而遂有申之會吁是豈一日之故哉 自齊桓不與楚角諸侯雖一向一背而其患猶止於猾夏晉文親與楚敵後世徃於或勝或負而其勢遂駸駸抗衡至晉平不能與楚抗而夷夏之世不知其孰重孰輕也於是楚人遂得偃然以竊用吾中國之柄矣雖然武文以來楚未有抗衡於齊晉也其君無日不申訓於國申做於軍歲饑而振廩旅至而施惠大戶以行師量功而用民而民政舉於內入鄭而不以為俘克陳而不以為縣宮衛有環尹若放有六卒荆而舉古 以行則軍政立於外內選於親外選於舊而賢戚不遺復黃以勸善立午以

靖國而賞罰不失以區區之荆蠻至於強大莫拔豈偶然邪
 靈康以後楚雖專令於諸侯而自州來奔命楚始患吳鍾離
 燔師吳始易楚數十年間楚始不競加而疆場謀踈輕師而
 基亡郢之蓄城邑而墮挑吳之釁無極好讒蔡人速飛伍員
 逃吳楚君盱食蕞越出師宋師日至遂至以堂堂之楚喪敗
 相尋亦果曷為而然邪由始而觀之楚自微而浸盛由終而
 觀之楚方盛而已衰蓋無平不陂無往不復夷狄之強固未
 有能久而不替者理之常也雖然楚本熊繹之後由為強邦
 春秋之前既以為夷狄矣春秋之世聖人雖屢進之迄不得
 與滕薛之侯例以爵通於中國其罪抑安在邪世竊名號而
 拔本塞源之罪蓋有不勝誅者不然楚荊州之國也聖人豈
 宜以其地而夷狄之哉不亦可歟

十一列國夷國吳世紀 吳

吳泰伯之昭也讓國於季歷而自竄於吳仲雍嗣之越十有
 九世而吳事始見於經也實壽夢之二年後十七年而春秋
 實夫差十五年又八年而越滅吳

成七伐郟 入州來

十五十七國會于鍾離

襄三楚嬰齊伐

五二國會吳善道

十二國會于戚

十二國會于柵遂滅偃陽

十二子乘卒

十四十五國會吳入向

楚公子貞伐

二十四楚伐

二十五子過伐楚門于巢卒

二十九闞弒餘祭 使札來聘

昭元莒展輿出奔吳

五楚八國伐

六楚蕞罷伐

十三滅州來

十五夷朱卒

十七吳楚戰長岸

二十三敗頓胡六國于雞父胡沈滅獲陳夏齧

二十四伐巢

二十七吳弒君僚吳王闔廬元

三十滅徐

三十二伐越

定二楚伐

四蔡以吳及楚戰柏舉楚敗

績入郢

五於越入吳

於越敗吳攜李

光卒吳王夫差元年

哀三蔡放大夫獵于吳

四蔡辰出奔吳

六伐陳 叔還會祖

七公會吳郟

八吳伐我

十公會吳伐齊 救陳

十一公會吳伐齊戰艾陵齊敗績獲國書

十二公會吳橐臯

十三公會晉吳黃池

於越入吳

序吳世紀曰吳姬姓之長春秋夷之何邪吳僻在海濱不與姬通有年數矣至其極盛亦不過以子錄之蓋假竊名號不

有宗周春秋不得不深絕焉者然嘗以經攷之觀其與晉強弱之形與楚越消長之勢則其事有不獨係一吳之盛衰者蓋其始盛也當晉方患楚而未暇於憂吳其後也當中國倚重於吳而吳亦甚有意於駕晉又其後也晉伯不在諸侯中國亦甚易與則吳之所爭者不在晉而在楚又其最後也中國既不足畏楚人亦不能強而吳之所憂者乃不在楚而在越其顛末有可考者焉何以言之伐鄭之師吳事之始見於經者也壽夢立之二年而兵在郟郟魯屬也莫或救之亦可見中國之無伯當是之時喪師于郟而大恥未洒置盟于蜀而齊言尚新晉景主盟方自虞楚人之至於吳奚暇憂哉馬陵之盟未暇却楚而州來之入乃俛焉有求於吳以夷狄攻夷狄於中國若未甚害資一夷狄以求逞於一夷狄中國之大體始虧矣無何鍾離之會既以晉而成好於吳善道之

會又以魯衛而私好於吳然自祖以前猶曰致吳以從中國之會也而向以後往往以會吳而勤諸侯之行矣吾觀嬰齊伐吳楚始忌吳也至是子囊伐吳楚益忌吳也楚人猶知忌吳而中國諸侯乃帖然與之周旋而不為疾何邪餘祭方立晉楚實為弭兵之會不能四年而夷昧君吳季札聘魯蓋札之聘猶餘祭之使也以吳之於中國向也殊會而今也稱聘向也狄之言國今也進之稱子向也略之未有位號而今也詳之以著其君臣之辭當中夏苟安之時季子以嫡嗣還觀於上國此其意豈可測哉然魯昭之始凡三年間楚三伐吳而吳不一報吳豈忘楚者乎于時號會復講而晉伯益微申盟麋至而荆蠻方肆吳人不復知晉之可畏則其所爭亦惟一楚耳未幾楚有乾谿之變吳始有州來之師戰于長岸戰于雞父既滅巢又滅徐又伐越夫滅國以自殖伐國以立威

吳亦何所不至哉魯定之明年楚嘗伐吳矣不二年而吳遂入郢以楚不忍於吳而薄伐其鄙吳深創於楚而直造其國都吳楚之強弱於此可見自是致魯會鄆偕魯伐齊而魯奔命楚伐陳而吳爭之魯戰齊而吳助之而齊楚亦病於奔命夫威令長於魯兵患徧於齊楚迄于黃池之會春秋紀以兩伯之辭可謂極盛矣然德薄而多大功慮淺而數得志故方其在會而諸侯莫敢不至也區區之越乃得乘間以入其國吁當夫差以前吳之所憂豈不在楚而孰知其禍乃出於越哉君子觀吳之盛衰終始凡四變蓋其患始於晉之未暇憂吳成於吳之為援於晉遂至晉弱而吳強晉輕而吳重吳始駸駸求駕于中國楚衰而吳興吳仆而越起中國始展轉蒙患於夷狄吁是其事豈直係於一吳之盛衰而已哉善觀春秋亦可以深致其責於景厲以來之晉

十二 夷國世紀 秦

秦伯益之後非子受封於孝王附庸之邑在秦襄公有功於平王始受岐豐之地列為諸侯穆公伯西戎以河為竟垂二十世卒并諸國

僖十五年 穆公十五年 戰韓獲晉侯

二十八 戰城濮會溫圍許

二十九 盟翟泉

三十 晉秦圍鄭

三十一 入滑

晉及姜戎敗秦于殺

文二 戰彭衙秦敗績

晉宋陳鄭伐

三伐晉

四 晉伐

五 入郟

六 康公元

七 晉秦戰令狐

晉先蔑奔

九 來歸僖公成風燧

十 伐晉

十二 術來聘

晉秦戰河曲

十六 楚秦巴滅庸

十八 營卒 共公元

宣元 晉趙穿侵崇 秦與國

二 伐晉

四 縮卒 桓公立

十五 伐晉

成二 楚盟蜀

九 秦白狄伐晉

十三 九國會伐 至伐

十四 秦伯卒 景公立

襄十 晉伐

十一 伐晉

十四 十三國會伐

序秦世紀曰秦之為狄其始於殺之戰歟夫秦以非子之餘踐岐豐之地膺顯服以為諸侯春秋之狄之也豈以其地哉觀秦入春秋七十八年而始見經實穆公十有五年由是秦之得書于冊者凡六君然其間秦事之可致捨入祿滅庸好魯盟蜀數事之外大抵秦晉兵爭之跡耳蓋自穆公釋韓之憾而從事於踐土之盟於是會于溫盟于翟泉借役于圍鄭

戮力同心猶駢之靳未始有隙也入滑之師啓釁自秦利人之危以襲其國不哀人之喪而越其竟背盟失信以貪勤民而弃其師是狄道也由毅之戰遂有彭衙之戰令狐之戰河曲之戰其餘秦之伐晉者六晉之伐秦者亦六暴兩國之衆興數十年報復之師更四君而未已蓋至襄十一年戰櫟之役秦晉交伐之後始絕書于經原始要終則春秋所為狄秦于毅者良有自也然嘗即春秋之所筆以求詩書之所載秦之本末尚有可得而考者夫春秋書秦之事亦甚貶矣至於定書百篇終以秦誓乃甚有取於穆公悔過之善秦詩十篇穆公無美有刺而詳紀秦仲以來強大之由不少殺焉何哉聖人之欲用夏變夷意甚切矣秦起西陲與戎狄雜居本以富強為先襄公以後務以耕戰自力而不知禮義終秦之氣象大抵未免似戎讀車鄰駟鐵小戎數詩可以槩見穆公察

懲力創於毅之役處仁一義向背好惡從而一變前日所詆墓木已拱者非今之所謂督力既愆之良士邪而庶幾有之前日所喜過周超乘者非今之所謂射御不違之勇夫邪而庶幾不欲之截截巧辯能移人之辭者固前日求之惟恐其少者也今乃以其徒實繁而厭之方寸既改羣動皆新充此心也帝王何遠之有蒹葭之詩無作可也何秦俗之不可變哉而秦之卒為狄則是可歎已故聖人於詩述秦仲始大之由以明秦有當變之俗於書備述穆公悔過之美以著穆公幾有能變之道於春秋則追貶穆公始禍之端歷載秦晉以來交兵之跡而狄之以惜秦之終不能變也吁豈不深切著明哉蓋戰毅之後穆公之身伐晉者再亦不能實實誓之言矣尚何責於來世君子觀穆以前秦事未有可稱由穆以後其君皆不逮穆遠甚則秦穆一身實秦國本末盛衰之所係

可不察歟

〔十三〕夷國世紀 越

越夏后之苗裔也少康之庶子封於會稽二十餘世實為允常勾踐繼之至魯昭公五年越事始見於春秋勾踐伯在春秋後其後七世爭起於諸子又七世而閩君搖受封於漢以為越王實勾踐之後

〔昭五〕王允常楚越八國伐吳 〔八〕楚滅陳執招放于越

〔三十二〕吳伐越

〔定五〕於越伐吳

〔十四〕於越敗吳于檣李

〔哀元〕是歲吳王夫差敗越于夫椒越子以甲楯五千保于會稽

〔十三〕於越入吳

序越世紀曰越事之書可一二數矣雖然君子有觀焉夫越以伯禹之苗裔受會稽之別封其來久矣入春秋百九十餘年越始見經以吳楚之僭春秋夷之其極盛也猶得書子越

於春秋之世常不過以國稱豈非僻陋之甚乎獨勾踐與吳之事可以勵臣子之節為振偷數懦之勸是未容置而弗論也蓋越自楚靈之強常從之以伐吳西闔廬之立遂因之以仇越是以夫差敗于檣李而懷必報之忿及勾踐困于夫椒而遂成不釋之讎然二十年間越不為沼吳其泯矣吁深於仇人者無躁謀巧於用國者無近功齊復紀讎君子不樂其力之有餘魯釋齊怨君子不恕其力之不足當太王之時而不珍其愠不墮厥問以駮昆夷可也當秦襄之世而四牡孔阜儀駟孔羣以討西戎可也有田一成有衆一旅則經綸之餘力足以祀夏務材訓農通商惠工則漕之餘民足以造衛此皆已事之驗夫五千之甲衆至少也會稽之棲地至褊也仇吳之念隱忍於柔服之初秦吳之計蓄於臥薪嘗膽之時而沼吳之志卒逞於生聚教訓之間所欲盡從如探囊取物

如執券責負豈非勾踐之所以伯種蠡之所以善謀伍子胥之徒之所甚忌者歟吁天下之事無小大也能勝者勢而先勝者理可為者力而必為者志由越之事則興事造業者亦可以略觀矣

十四夷國世紀 戎

春秋之世戎之類有六曰山戎曰北戎曰姜戎曰雒戎曰茅戎曰陸渾之戎而戎蠻子又諸戎之別種也戎事之書於經者凡十三八見於莊僖以前而宣成以後百二十五年書戎事者纔五蓋成宣以後戎世為晉役諸侯鮮得而治之獨晉楚相仇時有治戎之事焉

隱二公會戎潛

公及戎盟唐

桓二公及戎盟唐 至唐

莊十八公追戎濟西

二十齊人伐戎

二十四戎侵曹曹羈奔陳赤歸

二十六公伐戎 至伐 三十齊人伐山戎

三十一齊侯來獻戎捷

僖十齊許伐北戎 杜云山戎 三十三晉及姜戎敗秦殺

文八遂會雒戎盟暴

宣三楚伐陸渾之戎

成元王師敗績茅戎

昭十六楚誘戎蠻子殺之 十七晉荀虞滅陸渾之戎

哀四晉執戎蠻子赤歸楚

序戎世紀曰春秋之世戎為中國患亟矣雖然有由也先王居禱杞于四裔使夷不干夏戎不偏華周室之衰王政不行於是贄幣不通言語不同之人遂居衣冠禮樂之地蓋莊僖之初經之所書獨不過曰戎曰山戎曰北戎僖文之後始有

所謂雒戎者姜戎者陸渾戎者雒戎居雒姜戎居于晉南陸渾居于伊川名號雖殊種類則一犬羊雜居蓋莫甚於東周之季矣嗚呼戎狄是膺荆舒是懲周公之法也晉齊之伯均為有功於中國然以經攷之齊有攘戎之功晉有致戎之罪不可不察也何以言之魯隱之末戎狃於東遷之釁恣睢孰甚焉楚丘之變凡伯為執侵曹之禍赤子以歸是非細故小變矣然皆齊伯之未與與齊伯之未定也盟幽以後桓公始大振治戎之旅向者魯之盟會相尋凡以戎故燕之職貢不至亦以戎故自桓公遇魯以謀之而魯患息借許以伐之而燕覺弭戎之戢齊之力也而晉自惠之反實誘戎以遷于伊襄之伯實挾戎以戰于殺自是以後晉嘗恃戎以為犄角之助戎常事晉以為不侵不叛之臣故其勢不得不至於陸梁異時徐吾之役瑕嘉亦既平茅戎於周矣而蠢蠢之眾猶得挾邠垂之怨以敗王師向之會范宣子嘗欲退駒支於盟矣而譎譎之辭終得援惠襄之舊以為晉賜戎之張誰實啓之歟故嘗觀詹伯告晉之辭有曰戎有中國誰之咎也后稷封殖天下今戎制之不亦難乎吁周公膺戎之法廢矣桓公攘戎之功衰矣晉人致戎之罪不可遠矣

十五 夷國世紀 秋

春秋二百四十二年書狄者三十六其種有長狄赤狄白狄而路氏甲氏留吁又赤狄之種也事見於文宣以前之經為多成襄以降書狄事纔十之二焉盛衰之故亦槩可攷矣

莊二十三 狄伐邢

閔二 狄入衛

僖八 狄伐晉

十三 狄侵衛

十 狄滅溫 溫子奔衛

十四 狄侵鄭

十八 狄救齊 邢狄伐衛 二十 齊狄盟邢

二十一 狄侵衛 二十四 狄伐鄭

三十 狄侵齊 三十一 狄侵衛

三十二 衛侵狄 衛及狄盟 三十三 狄侵齊 晉敗狄箕

文四 狄侵齊 六 晉狐射姑出奔狄

七 狄侵我西鄙 九 狄侵齊

十 狄侵宋 十一 狄侵齊

得臣敗狄鹹 長狄 十三 狄侵衛

宣十一 晉會敗攢函

成十二 晉敗狄交剛

昭元 荀吳敗狄大鹵

宣三 赤狄侵齊 四 赤狄侵齊

十五 晉滅赤狄潞氏以嬰兒歸

十六 晉滅赤狄甲氏留吁戚

宣八 晉白狄伐秦

成九 秦白狄伐晉

襄十八 白狄來

序狄世紀曰春秋之世狄戎俱為中國患然狄重而戎輕戎之類有山戎有姜戎雜戎而獨名戎者為最強狄之類有赤狄白狄長狄而獨名狄者亦最強狄比諸戎性猶悍鷙戎雖侵暴中國其強易弱狄人敢於滅國當齊桓之亡與聞中國之政不但侵暴而已也然嘗考之經狄之患莫甚於僖文之春秋矣齊之初伯嘗謀邢謀衛自是數十年間嘗置夷狄於不問晉之盛時亦不過敗狄于箕之一役未幾一二世以後乃累治狄而不置何邪縱狄若齊桓之拙謀亦無損於伯業之盛治狄誠晉人之雋功而適足以見伯業之衰亦可以考

求其故矣蓋嘗論之齊自桓公數年經營以免邢衛於難也
 會檀以來荆患方張衆志未固方將并謀畢力改北轅而南
 向以圖帖荆之功召陵聽命而諸侯已勤矣是猶門戶之
 既悉力以去之藩籬之侮苟幸其不至於為患蓋亦小安焉
 以休吾室內之人此齊桓之謀國能不強其力之所為管仲
 之相其君能度其德之所能舉故縱敵不問而卒無損於伯
 業之盛晉自景公君臣不相聽以為邲之敗也平丘以降諸
 侯盡離伯業大失於是含垢忍恥閉南關而北出以尋治狄
 之忿狄雖大創而晉之威重益墮矣是猶烏獲遇盜扁戶以
 避之羞其不以力稱乃逞虐於厠役為士者笑之此皆伯宗
 苟伯之謬欲以文其喪敗削弱之詬韓范諸臣之專欲以行
 其厚自封殖之謀雖治狄不置適以見其伯業之衰夫略近
 效而圖大體故縱狄而不足以為懼匿大恥而求淺功故治

狄而不足以為武齊晉之故亦槩可攷矣雖然春秋之世諸
 侯蒙狄之患者凡八國當齊桓之盛猶所不免而自魯襄以
 後咸無聞焉晉人剪除之力亦豈可掩哉惟其舍內以事外
 是以君子無取焉耳

十六 夷國世紀 微國

春秋之初微國之見於經者甚寡僖公以後始稍出焉聖人
 因事備錄亦可以觀世變矣

莊二十六 公會宋齊伐徐

僖二 徐人取舒

徐即諸夏徐在下邳舒在廬江相去甚遠而越國滅國

十五 楚人伐徐敎大夫

徐楚敗徐婁林

十七 齊徐伐英氏

文七 徐伐莒

昭五 楚徐八國伐吳

十二 楚伐徐

十六 齊伐徐

僖十五 齊曹伐厲 以救徐

僖五 楚滅弦 弦子奔黃 江黃道柏方睦於齊皆弦姻也弦子恃之而不事楚

僖二十 楚伐隨 隨以漢東諸侯叛楚桓六年楚武王侵隨少師請追之季梁止之隨侯懼而修改楚不敢伐

哀元 楚陳隨許圍蔡

僖二十六 楚滅夔 夔子歸

僖二十九 介葛盧來 東夷 介葛盧來

三十 介侵蕭

文十一 楚伐麇

十二 楚圍巢 吳楚間小國

昭二十四 吳滅巢

文十六 楚秦巴滅庸 楚為眾舒叛故舒楚一國

宣九 取根牟 東夷國

成二 晉荀息伐麇 咎如 赤狄別種

成十七 楚滅舒庸

襄二十五 楚屈建滅舒鳩 楚屬國叛楚

襄二十五 齊高止出奔北燕

昭三 北燕穎出奔齊

六 齊伐北燕

十二 齊高偃納北燕伯于陽

昭四 楚蔡陳許頓胡沈淮夷伐吳

昭四 楚遂滅賴

昭十二 晉伐鮮虞 白狄別種

十五 晉荀息伐鮮虞

定四 晉衛伐鮮虞

五 晉士鞅伐鮮虞

哀六 晉趙鞅伐鮮虞 共二十國

序夷微國紀曰深哉遠乎春秋之為中國慮也大而吳楚之君戎狄之人亦既深排而力抑痛懲而亟膺之矣至於葛爾之夷至無足道聖人猶必因事謹誌何哉嗚呼春秋之世其

始也王室與伯圖相為強弱其後也王室不必言矣乃中國與夷狄相為消長又其後也中國不足畏矣夷狄又自相盛衰觀隱桓之初夷狄之見于經者不過曰戎曰荆莊僖以後介也徐也舒也庸也始累累而書于冊也巴以人稱甲潞以氏稱鮮虞唐咎乃以號稱蓋不一而足嗚呼彼吳楚戎狄之國既得以交起而迭仆更廢而互興也藐然僻陋之夷習於逞思亦安知其終不足以抗衡哉是聖人之所憂也在易姤之初六曰羸豕孚蹢躅夫姤陰始生而將長之卦也制之之道當於其微羸弱之豕雖未極剛猛而中心常在於蹢躅猶陰微而在外其心常在於剝復小人雖微而在下其心常在於勝君子中國之有夷狄猶陽之有陰君子之有小人也春秋之於微國皆不敢少略焉其為中國慮豈不深遠乎哉雖然春秋之世糾逖異類一正諸華亦惟齊晉之伯是賴也夫

何治大舍心其力已有不暇為者當齊桓始伯徐舒有爭晉文盛時介蕭有惡則下是亦安能為之謀哉吁論至於是齊晉攘夷之烈信微矣

十七 夷國世紀 附夷微國

春秋大國之從夷者聖人既正色厲辭以誅之矣微國之事故得而略焉彼其行李不通於諸華非因齊晉吳楚之有事鮮有得見于經者姑即其可攷者攷而論之

僖二 齊宋江黃盟貫 三 齊宋江黃會陽穀

十一 楚人伐黃

文三 楚圍江晉處父伐楚救江

文四 楚人滅江

僖二十五 楚圍陳納頓子于頓 頓迫於陳而存楚

襄四 陳人圍頓

昭四 楚頓會申 楚頓伐吳二十三 吳敗頓六國于雞父

定四 公會頓子召陵 十四 楚滅頓以牂歸

文三 晉六國伐沈沈潰以其服楚

昭四 楚沈會申 楚沈伐吳 五 楚沈伐吳

二十三 吳敗沈雞父沈滅

定四 蔡滅沈以沈子歸殺之

文五 秦入郟楚滅六皇陶庭堅後 叛楚即東夷

宣元 晉趙鞅侵崇秦與國

昭四 胡會申 胡伐吳 二十三 吳敗胡雞父胡滅

定十五 楚滅胡以豹歸共八國

序附夷微國紀曰春秋諸侯偏於從楚者衆矣當荆吳甚

盛時自魯宋大國至於邾莒小侯未有不折而從之者矣春

秋於齊之盟曰人楚以人諸侯也宋之役亦曰人楚以人諸

侯也桓之會殊吳而致魯鄆之會沒鄭而逃陳其貶絕之甚

矣然至於會宋則列書大夫會申而悉書諸侯會黃池則著

晉而不沒公端若無所貶焉何哉亦嘗求其故矣彼伯業不

競不在諸侯主齊盟者亦既俛焉聽命於吳楚而偕之為會

矣則宋魯陳蔡鄭許之國何尤乎宋魯陳蔡鄭許之國不足

罪則夫小於宋魯陳蔡鄭許之國又何尤乎故嘗論齊桓之

伯能帖荆於召陵而不能止江黃之伐晉文之伯能致秦敗

楚於城濮而不能保郟六之不亡桓文且爾他何望哉小國

尚安所恃而不奔走於從夷也是故崇屬於秦郟屬於吳沈

徐胡頓皆屬於楚凡小國在夷狄之宇下者信未有罪焉爾

末年齊晉益微中國不能以一矢遺夷狄而封豕長蛇之類

自相雄奪其得免於滅亡者亦鮮焉吁小國之甘於從夷將

以求免也而終無以自立又何其甚不幸歟昔吳伐郟季文

子曰中國之無伯也世變至是春秋女得而不終乎

春秋王霸列國世紀編卷第三

後學 成德 校訂

